

東
華
續
錄

東華續錄

乾隆二十一

臣王先謙敬編

臣周澐蕃恭校

乾隆十年乙丑春正月丙子諭三載賓興國家興賢右文之大典必諸弊悉去然後可以拔取真才所謂根莠不肅則嘉禾不生其理顯然歷來查弊之法不可不嚴者此慎重科名厚待良士之道昨歲朕親臨貢院徧觀堂所周覽號舍矮屋風簷備極辛苦深可軫念比賦四詩令刊堂壁可以知朕心矣今歲會試已展期三月以待春溫嗣後卽以爲例茲特豫降旨命禮部侍郎楊錫紱知貢舉俾伊得先期計議從容料理楊錫紱可仰體朕心當嚴則嚴當寬則寬於釐剔弊端之中寓優恤士子之意二者相成不相悖也卽如蠟燭一事因有燭中夾帶之弊是以改爲官給若向士子多

索價值則不可或蠟少而燭質不堅則更不可朕姑舉一節以類其餘知貢舉者其善爲之○甲申封哈密公玉素布爲貝子○戊子諭江南地居腹內無深山窮谷藏聚奸匪之藪所最宜加意者莫如海防我國家承平日久海疆甯謐中外習爲固然然國家防患在於未形未雨綢繆古人所云今江省之上海崇明劉河福山狼山各緊要海口營汛非不周羅斥堠非不嚴密戰船非不連檣接燬然俱付之三五偏裨督率兵卒往來戍守而已凡形勢之扼塞防守之機宜口岸之平險何處爲瞭望之所何處爲守禦之區向來督撫俱未親至其地考訂而講求焉夫按圖聚米終不如目擊身親況士卒何知大槩惡勞好逸若督撫時一經臨自必震動恪恭不致廢弛怠惰且江南海口數處毗連附近巡行往返不過而月亦不致勞人廢事該督撫等應倣別省總督巡邊之例於海

口緊要之處遞年輪流巡視一次固不必有所紛更以爲建白亦不可草率一過視同具文防範之事宜旣得深討於平日備禦之營制亦得講究其萬全更可不時簡閱操演以整飭戎行似屬有益著該督撫等妥商定議具奏尋議奏海防緊要分應輪流巡視擬於本年督臣先往次年則及撫臣周而復始著爲令往巡之時務將形勢之扼塞防守之機宜口岸之平險及何處爲瞭望之所何處爲守禦之區逐一察看詳細探討並順路簡閱沿海營伍事竣具摺奏聞得旨須妥協據實辦理不可虛應故事也○壬辰諭科場首嚴懷挾而不肖喪廉者流竟有衣裳中藏匿文字者是以有皮衣去面氈衣去裏之例朕思春月會試風簷之下非衣裳不足以禦寒若將製就皮衣悉令去其褥襲應試多人旣不免改造之費亦非所以飾觀瞻也著將皮衣去面之例停止但於入場之

時悉心察視按檢以防弊竇爲士子者更當感朕體恤從寬之意

人人自愛以從前惡習爲深戒况旣登賢書又非生監可比豈可

爲此穿窬之事喪其已成之功名旣負朕恩又罹國法諒不若是

之愚也知貢舉者可卽通行曉諭之○降嚴瑞龍爲直隸按察使

以陶正中爲山西布政使

直隸按察使

○乙未諭爲政務在得人牧民

先於擇吏古者任官必加辨論所以慎其選也國家撫育黎元簡

用親民之吏期於循良報最教養兼資銓用多在科目而需次年

久每致衰老昏庸不能勝百里之任其日漸廢弛貽誤地方皆人

人所共知共見者是以上年朕命大學士九卿等定議於每科會

試發榜之後揀選年力强健質地明白者列爲一等以縣令用若

年力精神堪司教職者列爲二等以正諭銓選其應用訓導者與

歲貢分缺選補至年力衰邁不堪復就訓導者以應得之銜休致

如此分別庶幾人稱其職於吏治自有裨益但朕復再三籌度揀選之法自不可易然人材難以豫料若一經驗看卽爲定衡則入選者焉保其必稱循良更恐逾時或又不堪任用况才具尙不能一望而知而心術又豈能外觀卽定所可知者不過年底狀貌耳與其定於數年之前不若審於選官之日也今當會試之年士子雲集京師初次揀選人數必多恐汰除者眾此等舉子未免絕其上進之望志氣驟頽更非鼓舞人材之意向來月選之後原有九卿驗看之例引見之時朕又量材改調或補教職或令休致臨時自可區別毋庸豫爲揀擇著將新定會試榜後揀選之例停止嗣後惟令九卿秉公驗看詳慎去取勿徇情面勿事姑容候朕於引見時再加酌定自不使庸材濫司民社而吏治亦可收得人之效矣該部卽通行曉諭知之○飭各督撫提鎮親驗馬步兵丁充補

糧缺○命安甯回江蘇布政使任愛必達回吏部郎中任○丙申
諭大阿哥生母哲妃著追封皇貴妃○戊戌諭皇貴妃富察氏著
追封哲嫺皇貴妃○ 皇貴妃高佳氏薨加封 慧賢皇貴妃○
己亥準噶爾台吉噶爾丹策零遣使臣哈柳奉表至京表曰前奉
諭旨接濟我等前往西藏之人牲畜路費念經之時又俯准所請
辦理不勝欣喜感激但準噶爾見在新立法性教所有西藏請來
好喇嘛大半亡故存者年皆衰邁若由土伯特地方揀選通於經
呪之人賞發前來立法可期永久爲此奏請餘言令使臣口奏附
進玉盃木盃各一件貂皮三十張犬馬各二奏入 上命尙書海
望傳詢哈柳曰表內令來使口奏何語哈柳奏稱噶爾丹策零令
將請發喇嘛事口奏又我等熬茶之人由藏回來頗羅鼐辦給牲
畜路費不甚妥協頗羅鼐原係拉藏汗屬下書寫之人大抵仍念

舊讎所以如此乞諭頗羅鼎照前例辦理報聞○壬寅諭據漕運總督顧琮奏稱刑部尙書張照丁憂同籍於正月十九日行至江南徐州地方病故已差員料理送回原籍等語張照才品優長兼諳法律且學問充裕詞藻清新二十年來侍直內廷勤慎素著前聞伊父訃音抱病星馳朕切諭其以禮節哀勿致毀瘠今聞在途溘逝朕心深爲惻悼著加太子太保吏部尙書所有應得卹典該部察例具奏尋予祭葬諡文敏

二月乙巳添設廣東駐防水師營○庚戌定八旗滿洲蒙古繙譯會試合文會試爲一場○辛亥 上幸內右門直廬視大學士鄂

爾泰疾○癸丑以敕文爲盛京兵部侍郎

由通政使遷

○甲寅諭嗣後

皇貴妃貴妃儀仗內紅段曲柄繖著改用金黃色妃嬪儀仗內著添用紅段曲柄繖一柄○賜準噶爾台吉噶爾丹策零敕書曰爾

奏稱前往西藏誦經人等蒙恩賞給牲畜口糧成全誦經之事不勝歡欣並請於土伯特賞給善經呪喇嘛數人令經呪之教可垂久遠推廣不絕等語爾尊崇佛道因立法性教欲請西藏喇嘛實一善事朕觀奏內辭意敬順懇切甚屬可嘉但去年爾使臣進藏熬茶已向郡王頗羅鼐求請喇嘛彼地喇嘛因念爾等曾在藏內騷擾不願前往故頗羅鼐託言無大皇帝旨意並未發往亦曾經頗羅鼐具奏今爾使臣哈柳口奏頗羅鼐仍念拉藏汗之讎於爾等進藏熬茶人性畜路費並未支給妥協由此觀之爾等兩地相疑未忘舊事朕爲大君不分內外視羣生如一體撫恤仁愛卽佛道亦以安撫眾生爲要眾喇嘛皆係佛門子弟伊等旣不情願朕勒令前往可乎卽使降旨令發給爾等喇嘛伊等亦未必肯發給賢能者此後爾等又不免藉爲口實反生怨望頗羅鼐係僻處遠

地之人準噶爾亦係僻處遠地之人爾等彼此互有違言朕豈可偏聽遽罪頗羅鼐乎爾等地方亦有喇嘛豈無一善於經呪者且敬佛廣教止在於心亦不必專憑經呪何必求諸他人此事朕不必降旨今特敕付使臣哈柳齋回爾其善體朕意隨敕賜各色段十端蟒段綵段各八端琉璃蠶器各八事○乙卯 上啓鑾謁東陵幸盤山○己未 上謁 昭西陵 孝陵 孝東陵 景陵詣 壽祺皇貴太妃園寢奠酒回鑾○辛酉 上幸盤山○壬戌諭教職爲司鐸之官訓課士子長養人材是其專職乃向來循例銓授未加別擇以致衰老龍鍾庸劣荒疏之人濫居師儒之席者不可勝數此中外所共知共見者是以去年朕命廷議古人原有七十致仕之義見任教職年至七十以上者令其休致之處曾經通行上年湖北巡撫晏斯盛以歲貢年已七十應否扣選一事摺

奏請旨時朕復思古來申公伏生老而傳經人之可用與否未可專以年齒論譬如年逾七十而強健者亦不可銓選乎未至七十而病憊龍鍾者亦可姑容乎惟當看其人之可用與否爲去取不當以七十爲限總在督撫學政秉公實心辦理庶有裨益已將此意明白批諭今伊又復具奏內稱每科鄉試後旣行淘汰至奉文截取之時是否再加考驗又稱拔貢副榜似應一體考驗等語是晏斯盛尙未領會朕務在得人之意但於細微之處沾沾奏請且此旨未曾頒布各省恐不知者尙多今應通行宣諭一體遵奉查上年有每科鄉試後令該督撫學政驗看大加淘汰一條昨甲子鄉試後已舉行一次其實在衰老龍鍾者業已去其大半嗣後此例不必每年舉行候朕因時制宜酌量降旨其恩拔歲副及挨貢應用教職者驗看之處仍照舊例行至該員臨選時給發文憑到

日仍加考驗必精力文藝足勝司教之職方准領憑赴任庶衰庸者不得濫膺而學校或可受得人之效○增貴州捧酢等關隘兵弁○丁卯 上還京師○諭本年會試照雍正八年例添賞供給○是月川陝總督公慶復奏上下瞻對番民慣爲夾壩勒獻賊賊抗拒不遵宜加懲創上下瞻對在鴉籠江東西夾江而居各二十餘寨東有大路二條西南北共有大路三條俱屬要隘界連四瓦述等土司凡瞻對之出入內地者俱由四瓦述地界經過從前曾以萬餘兵攻彼猶難一時懾服若兵力稍弱不足示威應選委鎮將各一員爲正副總統調漢兵四千名土兵四千名向該土酋等近巢駐紮並派撥明正土司裏塘土司等於各隘口堵禦四瓦述土司向懼瞻對侵犯暗相結納實非出於本心應開導使弗黨惡則瞻對勢孤然後指定各夾壩姓名寨分令該土酋等擒獻如上

瞻對悔悟卽獎令併攻下瞻對並令雜谷瓦寺等土司奮力前驅
大軍隨後進剿從之○四川布政使李如蘭奏首領佐雜人員請
與知縣教官一體甄別得旨君子不爲已甚者且州縣尙不能收
得人之效而況佐貳乎

三月癸酉朔日有食之○乙亥諭向來會試之期在二月則三月
發榜四月初開殿試雍正五年乾隆二年會試改期三月則四月
發榜五月初開殿試朕思五月天氣漸熱向來改殿試之期者因
三月會試係偶一舉行之事今三月會試已著爲定例則殿試之
期自應酌量變通著自今科爲始於四月二十六日殿試五月初
一日傳臚著該部卽通行曉諭知之○己卯工部議覆川陝總督
公慶復等奏陝省估修各屬城垣在一千兩以內之華陰等十處
工程州縣合力捐修督撫司道共勸其事應如所請辦理至稱成

陽等二十四州縣俱工在一千兩以上請將每年存剩公用銀兩
儘修外動用商雜稅銀得旨此議覆內慶復等奏稱一千兩以內
之工程令州縣合力捐修督撫司道等共勸其事等語部議准行
朕思大小各官所領養廉原以資其用度未必有餘可以幫修工
作儻名爲幫助而實派之百姓其弊更大轉不若名正言順以民
力襄事之爲公也此議不准行自古有力役之征庶人有赴功之
義况城垣爲地方保障正所以衛民而使之安堵卽如人所居者
廬舍耳而必環以牆垣爲藩籬之計其事甚明其理易曉且官民
原爲一體上下所以相維今則漫無聯屬恐日久相忘猝有用民
之事必且呼應不靈臣工爲此奏者頗多亦不無所見朕再四思
維凡有修建重大工程小民力不能辦者國家自不惜帑金爲之
經理至於些小城工補葺培護使之不至殘缺傾圯則小民農隙

之所能爲而有司之所當善爲董率者也餘依議○庚辰 上幸

大學士鄂爾泰第視疾○辛巳加鄂爾泰太傅○召徐杞來京以

阿思哈爲甘肅布政使

由吏部郎中遷

○

皇后行躬桑禮○甲申

上

御文華殿補行仲春經筵○兵部侍郎步軍統領舒赫德順天府

府尹蔣炳奏京師錢文自各門嚴查後價值漸平而近京州縣錢

價頓長總因各省糧艘將次抵通閩廣洋船將次抵津及一切停

泊船隻乘時南下奸民囤積販賣之所致請特降諭旨令倉場侍

郎嚴飭坐糧廳將回空糧船實力稽查直隸總督嚴飭沿河文武

官員將官民船隻悉心查察天津關監督將過關船內嚴搜清運

總督於直隸山東交界之菜園地方嚴飭遊擊與私鹽一體嚴查

天津道府將洋船賣貨得錢壓載回空之例停止令其用銀交易

並飭沿河地方官申諭各鋪戶毋得將大宗錢文售給船戶得旨

著照所請行錢文一事有稱廣爲開採者有稱嚴禁盜銷者有稱禁用銅器者有稱多則用銀少則用錢者其論不一卽如京師見在議定章程稽查辦理亦不過補偏救弊之一端終非正本清源之至計朕思五金皆以利民鼓鑄錢文原以代白金而廣運用卽如購買什物器用其價值之多寡原以銀爲定準初不在錢價之低昂今不探其本惟以錢爲適用其應用者皆以錢代而趨利之徒又復巧詐百出使錢價高昂以爲得計是輕重倒置不揣其本而惟末是務也不但商民情形如此卽官員辦公亦有沿習時弊者如直隸興修水利城工坐糧廳赴東採買布疋所領帑金數萬皆欲易錢運往其他官項大率如此夫所領帑金原係銀兩卽報銷亦以銀數覈算自應以銀給發何必兌換錢文應用若以領銀之人得受錢文爲便不知所發帑銀卽少至分釐亦可按數給予

與行使錢文何異況未必至分釐乎向來江浙地方有分釐皆用銀者何嘗見其不便嗣後官發銀兩之處除工部應發錢文者仍用錢文外其他支領銀兩俱卽以銀給發不得復易錢文至民間日用亦當以銀爲重其如何酌定條款剴切曉諭使商民共知之處著原議之大臣及見任辦理錢法之大臣詳議具奏○丁亥

上親耕藉田○己丑協辦大學士禮部尙書三泰乞休允之加太

子太保○庚寅命吏部尙書公訥親協辦大學士調來保爲禮部

尙書以盛安爲刑部尙書雅爾圖爲刑部左侍郎

由副都統遷

○癸巳

增廣西同知通判及州縣各官養廉○乙未諭大學士史貽直陳

世倌協辦大學士吏部尙書劉於義禮部尙書來保直隸總督高

斌雲南總督張允隨貴州總督張廣泗皆才品優長分猷中外謹

愼素著宣力多年史貽直陳世倌來保高斌俱著加太子太保劉

於義張廣泗張允隨俱著加太子少保以昭恩眷○已亥御史李
慎修奏北方民俗便於用錢見在廷臣議定條款不免苛急煩碎
請悉與蠲除聽民自便得旨李慎修此奏不無所見著大學士九
卿議奏但摺中所云諸大臣所議苛急煩碎等語甚非立言之體
諸大臣辦理錢法一事李慎修容或不知朕則無不知且在朝之
大臣與百執事宜亦無不知者亦可謂竭智盡慮於其間若各部
大臣皆似此任事急公乃朕所喜悅求之而弗可得者也第大臣
所用不過司員此中賢否不一加以市井近利之徒巧詐百出以
數人之智力敵千萬人之智力是以有所不能而交易之事原應
聽民之便非可以法禁繩之者此朕平心靜氣之論卽今如此辦
理亦朕之失於斟酌而已謂諸大臣奉行不善朕亦不能爲之諱
而李慎修草野新進直謂之曰苛急煩碎試問此數人所辦理有

所入已乎有爲國家錢糧起見之意乎以此詆毀大臣甚非靖共
爾位之義李愼修著嚴飭行○庚子諭雍正五年會試榜發後下
第舉人會蒙 皇考恩旨派出大臣檢閱落卷將其中文理明通
者各省取數十人再驗看人材年齒發往以教職補用朕卽位以
來亦曾舉行今科來京會試舉人較多於往歲而且積習一除士
風丕振似應加恩以示鼓勵著於出榜後將落卷封貯該部請旨
派出大臣秉公閱看選取發往各省畀以司鐸之任俾伊等早膺
官職及時效力以圖上進於課士或有裨補其如何分別選用之
處著交與吏部查辦至人員多寡之數亦交與吏部將從前所發
各員某省已選若干未選若干此次應選若干一併酌議具奏請
旨其有年至八十以上者該部帶領引見朕將優惠焉

夏四月癸卯朔命江南發帑銀五十六萬兩挑濬河道○甲辰御

史張孝埏奏士子出場多將文字謄送先達評閱見奉特旨俟出榜後派大臣另挑落卷畀以司鐸將來所派大臣未必非卽從前送閱之人嫌疑不免請令吏部議定各省應取明通數目咨禮部行知內簾考官於正榜外再取明通爲一榜得旨著照所請速行○丙午申諭各省學臣釐正文體○戊申兵部侍郎王承堯以病乞休允之○己酉實授宋厚貴州按察使○辛亥命修新聞苗疆古州等處城垣○乙卯諭大學士鄂爾泰公忠體國直諒持躬久任邊疆懋著惠績簡與機務思日贊襄才裕經綸學有根柢不愧國家之柱石允爲文武之儀型嚮用方殷倚毗正切去冬忽嬰痰疾朕心廑念選醫調治存問日頒今春病勢有加朕親往視加銜太傅冀其漸次獲痊不意竟致不起朕心深爲震悼特旨輟朝二日披覽遺疏具見忠君愛國之惓忱尤爲眷念不置昔我 皇考

有配享

太廟之遺詔著該部遵奉舉行並入祀賢良祠加祭二

次其他應得卹典一併察例具奏又諭大學士鄂爾泰著賞銀五
千兩辦理喪事本日著果親王大阿哥三阿哥前往奠祭各部院
大臣八旗都統御前侍衛乾清門侍衛三旗頭等侍衛以上侍衛
班長正黃旗侍衛等除值班外俱著往弔發引日往送尋予祭葬
諡文端○召那蘇圖來京以策楞爲兩廣總督調準泰爲廣東巡
撫以魏定國爲安徽巡撫

由布政使還

○丁巳命修四川沿邊各州縣

城垣○已未免甘肅平羅縣乾隆五年民欠○工部議准貴州總
督張廣泗奏黔省威甯大定等府州縣不通舟楫所產銅鉛陸運
維艱合之滇省運京銅每年千餘萬斤皆取道威甯畢節馱馬短
少趲運不前查大定府畢節縣屬赤水河下接遵義府仁懷縣屬
猿猴地方若開鑿通舟順流直達四川重慶水次水程五百餘里

計應開修大小六十八灘需銀四萬七千餘兩此河開通每年可
省腳價銀一萬三四千兩以三年之節省即可抵補開河工費再
黔省食鹽例銷川引若開修赤水河鹽船亦可通行鹽價立見平
減大定威甯等處卽偶遇豐歉不齊川米可以運濟實爲黔省無
窮之利應如所請從之○庚申調歸宣光爲兵部侍郎以蔣溥爲
吏部右侍郎楊錫紱爲湖南巡撫由禮部右侍郎遷○壬戌飭沿海省分
訓練水師○癸亥以旱命刑部清理庶獄○禁地方官徵糧積弊
○王廷諤因事解任以雅爾哈善爲福建按察使由汀漳道遷○以李
學裕爲安徽布政使張師載爲江蘇按察使由江南河道庫道遷○戊辰策
試天下貢士詔能深悉時政直言極諫者聽○己巳川陝總督公
慶復等奏瞻對賊番屢肆搶劫必增益官兵以懾其心膽方可一
勞永逸得旨議政王大臣議奏尋議如所請以建昌鎮總兵袁士

弼爲總統於川省提標各營雜谷瓦寺各土司內派出漢土官兵一萬二千名帶領進剿並撥附近瞻對之西甯鎮漢土官兵一千西藏郡王頗羅鼐所屬江卡番兵德爾格土兵各一千聯絡聲援巡邏偵探從之

五月壬申朔賜錢維城等三百十三人進士及第出身有差○甲

申以秦蕙田爲禮部右侍郎

由內閣學士遷

○丁亥頒

御製太學訓飭

士子文於天下學宮同

世祖章皇帝卧碑文

聖祖仁皇帝聖

諭廣訓

世宗憲皇帝御製朋黨論朔望宣講○戊子命訥親爲

保和殿大學士兼吏部尙書

○辛卯諭高斌著補授吏部尙書那

蘇圖著補授直隸總督高斌俟那蘇圖到任後來京辦事直隸水

利河道工程原係高斌劉於義經手著仍舊辦理如有查勘相度

之處卽從京師前往○停江南河工捐例○阿爾賽卒以梁詩正

爲戶部尙書

山戶部左侍郎遷

○丙申以涂運震爲內閣學士

由翰林院侍讀學士

遷

○己亥調呂熾爲戶部侍郎以范璨爲工部侍郎

由左副都御史遷

六月癸卯命撥黑龍江等處閒丁移屯佛忒喜蘇蘇壑地○甲辰

諭親民之官審理詞訟秉公剖決乃職分所當然在官無可居之功在民亦不必言感朕聞外省陋習有於詞訟審結之後勝者自以爲得計糾集親友鄰里製斗造扁懸掛公堂以爲媚悅無識有司亦恬然受之不以爲怪此等阿諛獻媚之習適以啓好訟生事之端且流爲粉飾沽名之弊澆風斷不可長嗣後著嚴行禁止其有仍前掛斗送扁者各該督撫將縱容徇隱之有司卽行參處並將本人一併治罪該部卽遵諭行○丁未諭我朝 列聖相承深仁厚澤無時不加意培養元元以期家給人足百年以來薄海內外物阜民康共享昇平之福朕臨御以來十年於茲撫育蒸黎民

依念切躬行儉約薄賦輕徭孜孜於保治之謨不敢稍有暇逸常
守節用愛人之訓凡以爲民也今寰宇敕甯旣鮮糜費之端亦無
兵役之耗所有解部錢糧原爲八旗官兵及京員俸餉之所需計
其所給較之宋時養兵之費猶不及十之一二至於各處工程爲
利民之舉者亦止取給於存公銀兩卽朕偶有巡幸賞賚所頒亦
屬無幾是以左藏尙有餘積數年以來直省偶有水旱朕加恩賑
濟多在常格之外如前年江南被水撫綏安插計費帑金千餘萬
兩凡此皆因災傷補救而沛恩澤者朕思海宇乂安民氣和樂持
盈保泰莫先於足民況天下之財止有此數不聚於上卽散於下
仰惟我 皇祖在位六十一年蠲租賜復之詔史不絕書又曾特
頒 恩旨將天下錢糧普免一次我 皇考旰食宵衣勤求民瘼
無日不下減賦寬徵之令如甘肅一省正賦全行豁免者十有餘

年此中外所共知者朕以繼志述事之心際重熙累洽之候欲使
海澨山陬一民一物無不均沾大澤爲是特頒諭旨將丙寅年直
省應徵錢糧通行蠲免其如何辦理之處著大學士會同該部卽
行定議具奏○命江南釐剔收漕積弊○己酉諭軍機大臣等朕
前降旨二氏之教由來已久原難盡行沙汰但遊手之徒借名出
家耗民財而妨民俗自不可聽其任意去來不爲清釐是以諭令
該部頒發度牒以憑查覈乃數年以來各省所報冊籍多寡不同
自因本地僧道多寡不同之故但止有沙汰之數而未有續收之
數是有裁而無收也亦非朕當日辦理此事之意古聖人之嚴闢
異端者因其有害於政教今之僧道不過鄉里無依之貧民竄入
空門以爲餬口計豈古昔異端之可比而能爲政教之害耶若果
去一僧道卽多一力田之農民則善政也但朕復思之彼游手坐

食之人既爲僧道習於安閒若迫令改業受手胼足胝之勞苦其勢有所不能不過市井中添無數游惰生事之輩耳轉不若收之寺觀中尙有羈縻也是以朕前原有漸次裁減之旨不可聽其引而日盛若緇黃之屬必應盡汰無遺則朕從前又何難降旨全行禁革不事姑容乎爾等可將朕意寄信與督撫令其善爲體會轉飭所屬從寬辦理若伊等錯會朕意以爲崇高佛老則又非矣○庚戌免安徽鳳陽等府州連年被災地方耗羨○命戶部侍郎傅恆軍機處行走○丁巳命直隸截留漕糧三十萬石於天津備用○命新設安西衛建文廟○以孫嘉淦爲左副都御史由宗人府府丞○調張師載爲江西按察使翁藻爲江蘇按察使○戊午赫慶通因病解任以馬金門爲陝西按察使由湖南辰永靖道遷○辛酉漕運總督顧琮奏直隸雨水稀少上廬宸懷減膳竭誠聖顏清減請稍

釋以寬 太后之心得旨願琮此奏朕覽之實深慚愧水旱之災上天之示儆不可諉氣數之適然但一切補救綢繆不可不盡人事以救流離而贖愆過違計及帑餉之費乎朕以德涼不能感召天和十年九憂旱去歲 聖母步禱朕悚仄靡甯卽今三庚已屆盈尺未霑憂出於不知食忘於已舉將使朕寬懷以慰 聖母聖母之心卽朕之心也其何以稍慰耶至云敕下臣工體察政務朕從來不以災傷之事委諸臣下讀史至因災詔免三公未嘗不鄙之昨截漕糶米以次舉行見今米價如常卽使四府成災賑恤之事亦所易辦寬刑赦罪適滋莠民玩法之風不可屢行故因顧琮之奏宣示朕意或此旨內事體有所未賅許各陳奏○癸亥上詣 黑龍潭祈雨○乙丑諭御史楊朝鼎前奏豫省失盜一事朕已敕交廷議今御史范廷楷痛斥楊朝鼎陳奏之非云豫省失

盜查乾隆七年共二十四案至八年止十九案九年止五案較之
往年不爲加多奈何張大其事議請重典楊朝鼎卽係協理河南
道御史忽然將無作有騁此刻深之談其意甚不可解又云楊朝
鼎奏請將盜犯之父兄伯叔等不同住址者一同治罪自昔虞廷
罰弗及嗣周室罪人不孥前史所載楊朝鼎豈其未知而貿貿若
是等語范廷楷詞氣激切幾於詈罵夫御史互相標榜一唱百和
暗結黨援固爲人心風俗之害設各執意見攻擊相尙不顧國家
政體若相詈然此風亦斷不可長且楊朝鼎所奏見在交議大臣
等自有持平之論如果所議准行范廷楷據伊意見以爲必不可
行再行陳奏未遲亦未爲不可所謂拾遺補缺自有其時也今乃
於甫經交議之際急於參奏負氣紛爭爲此過甚之語誠那一桂
從前所云不待部覆而摭拾浮言擾越瀆陳者朕早已降旨禁約

范廷楷獨不知之乎至於請朕撤回原招無庸交議竟以國家政務弗資六卿皆伊等御史可以操其行止者甚屬妄誕著嚴飭行原摺併發○大學士戶部議奏普免天下錢糧請照康熙五十一年例各省分三年輪免上允其請仍諭應免之年或遇水旱將特旨應免之數登記於次年開徵時豁除○是月兩廣總督策楞奏承審廣東布政使唐綏祖一案原參各款係那用公項及收受屬員餽送等情但唐綏祖因公那用公項雖係詳明辦理究未報部固有應得之罪而撫臣託庸之原參立意措詞未免涉於刻覈至續參贓款屬員首稟者居多而原首之梧州府戴肇名所供亦與原首不盡相符俟提齊人證訊取確供後再行具題得旨是朕早卽疑唐綏祖未必至此蓋彼乃一伶俐人豈有不知利害者但託庸向日與彼並無交涉何至有過於苛求之事此又朕所不解

者據實奏來又批此奏嘉悅之外無可批諭秉公辦理可也尋據奏覆唐綬祖與託庸有無素嫌留心體察殊不可得嗣有西省武弁赴東考驗詢悉唐綬祖素有擔當僚屬多怨而忌之上年託庸赴任值唐綬祖在京陛見卽有乘閒媒孽其短以錢糧聳人聽聞者託庸初任封疆意在整頓吏治且見那動款項爲錢糧所關是以不及細查從前奏明之案遽爲題參後知原參各款大半因公又改歸督臣承審疑而增懼未免有意搜求以責原參適有降調梧州府知府戴璧名原任泗城府知府劉暉澤從而迎合附會爲之出首並查出參革賓州知州阮維璋河池州知州朱紅侵欺得贓各款一併續參見在併案審理外省習氣督撫到任每亟圖參劾一二屬員以博整頓之名審後半屬子虛始知被人愚弄託庸辦理此事未免涉於習俗之見臣細覈供情或事屬有因而已甚

其說或並無其事而實出挾嫌俟覈實各供時將所首與所供不符之員另疏題參併案嚴審唐綬祖果有應得之罪必不敢絲毫徇隱而挾嫌誣揭之賊私亦不敢爲之附會惟有祇遵前諭秉公辦理得旨皆公論知道了

東華續錄

臣周淪蕃恭校

秋七月辛未朔免甘肅甯夏等三縣逋賦○壬申以周人驥爲湖

南按察使

由廣西右江道遷

○乙亥太僕寺卿喬學尹以老病乞休得旨

喬學尹年齒雖老尙可勝京員之任今以衰病具摺求退何不奏

請於藩司任內而陳乞於補授京職之時殊屬不合不准辭著飭

行○丁丑諭會典開載康熙年間選拔庶常後有選派講讀修撰

編檢數員爲小教習之例教習漢庶吉士詩文四六今科庶吉士

著寧院張廷玉阿克敦教習庶吉士之大臣德沛汪由敦於見任

講讀修撰編檢內選派數員爲小教習○乙酉命吏部尙書高斌

仍兼管直隸河道總督事○庚寅禮部議准福建巡撫周學健奏

閩省正音書院原爲教習閩人通曉官音而設但閩省士民甚多
一館之內止容十餘人正音固難徧及况教習多年鄉音仍舊虛
糜帑項請裁四門正音書院令州縣教職實力勸導從之○以黃
岳牧爲貴州按察使由廣東高廉道遷○壬辰 上奉 皇太后巡幸多
倫諾爾啓鑾○免經過地方額賦十分之四○乙未以直隸慶雲
等處歉收再弛奉天海禁一年○命撥口外八溝米石於熱河備
糶○丙申雨○撥宣化府屬屯豆十二萬石於京師備糶○飭有
司月給孝子節婦口糧○戊戌 上奉 皇太后駐蹕避暑山莊
○江南阜甯縣陳家浦河溢

八月庚子朔增奉天義州倉廩○癸卯 上自避暑山莊奉 皇
太后啓鑾○丁未建貴州古州等營塘汎○丙寅 上奉 皇太
后駐蹕多倫諾爾○丁卯免甘肅臨邊各屬明年應徵番糧草束

河東河西額徵屯糧草束蠲免三分之一○己巳 上自多倫諾爾奉 皇太后回鑾○是月川陝總督公慶復奏上瞻對應襲肯朱年未及歲聞大兵進勦繳印投誠並泣訴伊叔四朗謀奪土職願爲官兵引路進攻應止誅其屬下頑梗者肯朱可從寬宥至下瞻對班滾與四朗勾通交結不獻賊情罪較重儻敢抗違盡行勦滅署四川提督李質粹奏七月進勦瞻對官兵分三路前進南路由裏塘抵邊多等處係夔州協副將馬良柱統領北路由甘孜抵阿斯等處係松潘鎮總兵宋宗璋統領中路由沙普隆抵日裏等處係總統建昌鎮總兵袁士弼統領臣駐紮東俄洛在裏塘沙普隆兩路適中之地離甘孜亦不遠均可調度策應報聞

九月壬申諭從前 聖祖巡幸路經昌平曾遣官致祭明陵此次進口經過昌平應如何遣官致祭之處著該部查例具奏尋議遣

大臣各一人前往明代十二陵致祭從之○戊寅禁用非法刑具

○癸未 上駐蹕宣化府○甲申閱兵○乙酉命山西丁銀攤入

地糧○丙戌諭軍機大臣等上江之鳳潁泗等屬下江之淮揚徐海等屬數年以來屢被水患乾隆七年古溝石林決口會命高斌前往查勘辦理上年命大學士訥親前往查勘營伍亦經順便查勘河道俱會會同尹繼善白鍾山等將應行修濬各工程詳酌辦理不知今年被水之處卽伊等會查勘之處乎或雖經查勘尙未修理工段者乎抑或雖經修理仍復受患未收實效乎抑或從前查勘各工程與見今衝決漫溢之處其地不同其水亦支分派別乎其見在與舉各工將來果否有益抑仍不免將來之衝溢乎可寄信詢問並將今秋尹繼善白鍾山顧琮等奏報淮揚被水及陳家浦決口各摺令二人詳閱酌議與準泰條陳之摺一併議奏尋

奏尹繼善等奏稱阜甯縣陳家浦隄工七月間黃河驟漲隄身坐墊查該處地近海濱隄外半屬葦蕩荒地近因河流刷去外灘直偪隄根致被衝陷前據河臣奏口門見已掛淤俟水落後卽相機圈隄以束水勢第陳家浦乃數百年黃淮入海之路今雖衝決自應仍照舊口堵築合龍不失老隄故迹方爲鞏固應令河臣等加謹辦理至徐州之黃河以上南北兩岸北岸蘇家山一帶向無隄工遇盛漲聽其漫灘宣洩本年水勢過大是以多被淹浸其南岸毛城鋪一帶據稱洪溝民堰坍缺以致沿河被淹查洪溝河上承毛城鋪減下之水下達灘河入洪澤從前議築議疏俱以下游規制未定未經辦理見在臣等議覆準奏請開灘河一摺交督河二臣妥辦將來下游疏暢洪溝等處隄堰亦可補築其餘淮徐海各屬地方偪近湖河隄堰林立一有宣洩易受水患乾隆八年臣高

斌於善後案內議將各屬河溝修濬原以疏通積潦今因東省蒙
沂諸山連次發水猝被衝淹仍宣洩不及所致應令河臣等將舊
有河溝再行挑濬其上江之鳳潁泗諸屬據奏因七月內淮河泛
漲豫省之水建瓴而下秋禾被淹查該處淮滄交流專藉洪澤湖
爲尾閘乾隆九年臣訥親議將天然壩及南關車邏等壩酌量減
放並將高郵之官河通泰之鹽河與鹽之串場等河廣爲挑挖務
使洪湖減下之水不致阻隔亦爲上游諸州縣頻年積潦之故見
今工程尙未全舉應令河臣等依照題定工段作速趕辦以上各
府州縣被水地方有臣等曾經查勘者亦有未及徧閱者至一切
工程有彼時相度毋庸議建者亦有曾經議建尙未興工者並有
業已修建仍復受患與受患而非修建之地者總之河湖交會之
區流猛汎急卽有工程亦難使一勞永逸全不受患惟在司河者

度其被患之由豫籌弭患之策遇有險要臨時再行相機補救應將臣等酌議修築各事宜交尹繼善白鍾山酌量情形辦理得旨依議速行又奏廣東巡撫準泰請開濰河一摺查濰河二股俱發源於河南一自永城一自夏邑至濰溪口會毛城鋪減下之水由苻離集灰谷堆入五湖再由小河口下達安河匯歸洪澤湖紆回數百餘里經江南蕭宿靈虹等州縣卽古所謂浪蕩渠也濰溪口以上本係清流自會毛城鋪蔣溝等河減下之黃水濁沙停蓄每易淤墊臣高斌曾於總河任內將五湖上下之燕子口謝家溝等處俱行挑濬乾隆七年又經大學士陳世倌等奏將宿靈虹等處通濰溝渠疏濬以消積潦九年臣訥親至毛城鋪勘視洪溝蔣溝等河與督河二臣商及迤下一帶河道原議俟洪湖下游規制一定次第挑濬並議於兩旁增築子堰以防漲溢今準泰因在途次

目擊情形奏請急爲開濬應如所請濰河經由之處凡河身淤淺
窄狹者令該督等委員勘估速挑其應作何分員管轄及每年歲
修之處俱交與尹繼善白鍾山詳酌妥議得旨依議速行○己丑
命臺灣府屬編徵本色照內地正供一體普蠲○庚寅戶部議准
河南巡撫碩色奏鞏縣雍正十二年報墾荒地內有二頃十一畝
勘係宋陵四旁餘地郊縣雍正八年報墾旱地內有二頃六十五
畝勘係宋臣蘇軾蘇轍護墳餘地不便仍行耕種其原報升科銀
米並請豁免從之○癸巳 上奉 皇太后還京師○甲午實授
鄂彌達湖廣總督○丁酉諭本日御史李清芳奏今年秋審情實
人犯較多於前或經上年緩決今復改入情實者或經二次三次
四次之緩決亦有改爲情實者又有本應立決之犯敕令九卿議
覆改爲緩決今亦改爲情實者此等案件皆有可生之路今改爲

情實乃至三十餘案恐非仰體好生之德等語李清芳所奏甚屬迂謬蓋獲罪之犯法司定擬有應立決者有應監候者其監候囚犯秋審時九卿定擬有入於情實者有仍爲監候者有入於可矜者此皆酌其情罪輕重以分差等至於律應立決之犯法司初次題奏時朕令九卿定擬經九卿擬改監候而朕俞允者乃察其情事與極惡之犯微有不同不忍卽正典刑暫緩須臾耳非謂其罪確非情實而可以徐徐寬宥之也今李清芳之意以爲旣經奉旨改爲監候則不應入於情實之內糊塗已極設如其說將何以正倫常而弼風教乎至於緩決眾犯歷來頗有改擬情實者正以明其罪之難追雖一時暫緩終不免於情實使小民知所畏懼不敢輕蹈法網若謂一經緩決卽係應生之人不應復入情實竟是永免其死矣尙安得謂之緩乎法律不且虛設耶蓋緩決者一時之

恩情實者不易之法若其罪本應情實止因上年緩決而遂屈法以用恩則縱暴養奸無所底止矣夫制刑非古聖人所得已苟求其生而不得卽聖人亦無如之何故易於中孚則曰議獄緩死於旅則曰明慎用刑而不留獄言當緩者緩不當緩者不留也朕每年敬慎秋典各省案件雖多必詳覽再四務求其一緩可原期有合於古人服念旬時之意所頒諭旨明且悉矣此意願與諸臣共之乃今歲秋審外廷不無浮議朕深知之蓋盛安意在執法凡有關於倫常者必不容宥而孫嘉淦又欲博寬大之名一味姑容遂至議論繁多各持一見彼蔑倫傷教者固法所當誅然亦當念兇頑之民何以至此此皆平時教化之未洽以致民俗之澆漓我君臣方當自愧豈待此時秋曹諸臣誅一二人遂謂可以轉移惡俗盡明刑弼教之職乎若再一味姑容則兇頑漏網愈以長惡何以

慰死者之心而垂將來之戒若云多寬一人卽可以造福此尤婦人女子之見也大約九卿秋審其於彼此之閒亦無私心但各泥意見卽不免流於一偏不知用法貴乎平允若先存意見則爭執以求勝詞愈堅而情愈遠而理愈失求其平允豈可得乎書曰惟齊非齊有倫有要求其平允也朕心一本虛公毫無成見今年秋審兩議各案朕從九卿議者三從孫嘉淦議者一亦皆據理裁斷期協於中若謂朕之從九卿者多而從孫嘉淦者少意在於嚴則又大誤矣爰因李清芳陳奏明頒訓諭令九卿及內外臣工共知之李清芳摺併發○戊戌撥江蘇司庫銀十萬兩揚州府倉穀十萬石於淮安徐州二府備賑○實授尹繼善兩江總督慧中西安布政使安圖湖北布政使陳惠榮貴州布政使王芥園山東按察使張坦熊雲南按察使○侍郎錢陳羣奏明愍帝未營陵

寢歿後就葬妃園 世祖章皇帝敕令修葺並勒豐碑今八十餘年傾圯特甚請飭重加修葺如所請行○是月慶復奏上瞻對應襲肯朱赴袁士弼營投誠所屬頭目騷達邦等各帶土兵獻寨效用經該鎮收撫約北路官兵攻勦四朗至四朗係上瞻對賊首卽親出投順亦無可寬前議先攻四朗會合直搗下瞻對今宋宗璋因四朗母兄赴營投首卽爲撫賞令伊親出希圖草率完結與原議辦理互異但旣經招撫俟下瞻對平後再嚴審定罪宋宗璋令隨同併攻下瞻對如不遵調度卽行揭參又奏中南兩路官兵連獲下瞻對要卡六處共破五十餘寨中路官兵進攻茹色甲納溪兩處賊巢班滾迎敵官兵奮力夾攻賊眾散逃深箐見南路官兵往擦牙所進攻宋宗璋北路官兵已至阿寨地方在下瞻對交界處所得旨覽奏欣慰但焚殺者多陣斬者少尙未可謂全勝也

冬十月己亥朔順天府行鄉飲酒禮

御製補笙詩六篇命工歌

之○命四川番夷雜課賦稅照內地正供一體普蠲○壬寅命吏部尙書高斌察勘直隸水利○癸卯命江蘇安徽截留明年漕糧十五萬石備本省賑糶○甲辰命山西甯武縣建明總兵周遇吉祠編入祀典妻劉氏及同時盡節之遊擊崔雲王前士呂品貴王尙慎張大選高日光生員楊鼎勳楊鼎樞募友廩生賈三光等九人從祀○戊申設湖南新闢苗疆義學○己酉諭朕覽御史馮元欽所奏甚屬紕繆國家經理庶政事貴持平廷臣集議自宜一秉公心各屏偏私然亦無取於一倡百和諾諾唯唯故卽偶有參差適成公正至於刑名案件法司會擬更宜再三詳愼公同參覈以求情理之當或所見不同正不妨彼此商榷歸於平允聞有立意各殊兩議具奏者朕擇其善者而從之若有負氣紛爭立言失體

者朕必加以申飭乃馮元欽奏稱部臣剖白之言近於詆訶尙憶
張照爲尙書時於議橐中偶有一二逞其筆鋒迅利失當過中
語朕曾訓誡之近則無是也至稱各持是非竟成水火分門別戶
儼然敵讎不可不防其弊等語在馮元欽之意以爲防微杜漸而
不知伊竟蹈分門別戶之見故不覺輕出諸口將來若有黨同伐
異之事卽自此語開之也馮元欽著嚴飭行朕以廣開言路爲心
故寬待言官以收進言之益而伊等遂恃朕之不加譴責漸無忌
憚試問近日臺諫諸臣誠心獻替有裨於政治者幾人哉朕留心
察其隱微處心積慮總不出名利二途卽偶有建白者亦並非爲
國爲民思盡言官之職不過博取虛譽冀朕之賞識加以升遷外
用多得養廉耳卽如謝濟世當日於 皇考時竊慙直之名及復
爲御史則以養母爲辭懇請外用甫到道員之任卽請加增養廉

操守耿介者固如是乎吳煒爲御史時曾以河務參劾高斌及朕
用伊爲口北道伊畏首畏尾之意甚覺卑鄙朕諭之曰高斌斷不
存此意見若存此意見亦不成其爲高斌矣汝若因此與高斌抵
牾則過又在汝矣莫謂高斌不能執法也及朕今年巡幸宣化召
伊進見因諭之曰汝在任能受此荒涼否謂其南人或不習於邊
地也伊乃奏稱臣每年有養廉銀二千兩甚覺豐足矣是其志量
乃不過沾沾於利祿耳則迹其向之敢言果出何心耶李慎修自
負鯁直不知者亦以是稱之有人言其色厲而內荏其鯁直乃致
飾於外以爲欺世盜名計耳非真鯁直也朕初不深信及用爲御
史其所陳奏皆膠執不通之說無一可見之施行且有荒悖過甚
者朕降旨申飭宥其狂瞽仍用爲外道以觀其後效伊請訓之時
頓改爲委靡巽順以保全此監司之職不復作諫直之象設其鯁

直性成如古人之願留臺中以盡言職可也是其志亦止在溫飽
朕始信人言之不謬耳昔司馬光論臺諫之官其汲汲於名者則
深戒之是沽名且大不可況惟利是圖乎彼三人者頗負一時之
名而在儔人中伊亦岸然自異乃志趣卑陋若此全不知聖人謀
道不謀食之訓何況其下焉者乎爰因馮元欽之奏特頒此旨俾
言路諸臣各加儆惕痛洗從前陋習以副朕期望之意馮元欽摺
併發○大學士等議奏各省捐監收納本色行之已久半屬有名
無實應請停止仍歸部收捐折色得旨依議朕從前本欲將各項
捐納盡行停止後經廷議請酌留捐監一條以爲士子進身之階
尙屬可行是以允其所請嗣因倉儲爲民食攸關復諭令本省收
捐本色以補糶賑之用今鄂彌達等又請收捐折色經該部將捐
監之例分別議覆蓋因各省生監以捐穀爲難觀望不前者多於

積貯之數甚無裨補究非便民之策不得不因地變通但朕意究以積貯爲要圖各省收捐本邑之例亦不必停其有願在部捐折邑者亦聽如是則旣無州縣胥吏之滋弊亦不阻士子上進之階矣至直隸捐款原係一時權宜之計上年因河間天津等處旱象已成一切賑濟諸事需費浩繁兼之興修水利工程亦須濟用乃准廷臣之議照好善樂施之例暫開捐款以濟經費之不足今該處賑務俱已完竣水利工程辦理亦有頭緒所有捐款自應停止或外省尙有赴京投捐者遽令中阻恐有未便其如何定限停止之處著大學士會同該部定議具奏○內閣學士福十寶以老病乞休允之○庚戌命撥通州倉米五萬石於宣化備用○辛亥諭通政司事務簡少官員過多可酌量裁減一二員尋議漢右通政二缺請裁汰一缺從之○丙辰命西甯西藏番眾馬貢照內地一

體普蠲○戊午命四川嚴查嘲匪○禮部尙書任蘭枝以老病乞
休允之○庚申大學士等議准御史楊開鼎奏直隸捐款奉旨定
限停止但貢生與監生同爲士子上進之階非捐納職銜可比且
捐貢例無銓選不礙正途應請酌留至封典孝治攸關凡身霑一
命之榮皆思顯揚其祖父况所給止屬空銜與實授官職有閒亦
請酌留從之○癸亥賜董孟等七十五人武進士及第出身有差
○免江蘇海州等七州縣漕糧○甲子給江南災民葺屋銀兩○
丙寅留保因母病懇請來京侍養補授內閣學士以蘊著爲盛京
工部侍郎○張嗣昌因病解任以岳濬爲廣東按察使○是月慶
復奏進勦瞻對北路官兵連攻破喇嘛甲爾溫布所據鹽達卡隘
克木魯大山路官兵破底朱戰礪二座南路官兵攻擦牙所毀
四十六寨見會攻班滾巢穴得旨欣慰覽之○廣西右江鎮總兵

畢喚奏交匪莫康武等本年六月復占奪保樂夷州在三崗北幹
地方聚集報聞

十一月己巳王丕烈丁憂以王興吾爲河南按察使

由給事中遷

○辛

未增給旗員都統領侍衛內大臣以下養廉○壬申以王安國爲
禮部尙書命俟服闋赴部辦事○乙亥諭九卿所議錢永興致死
胞兄一案大學士陳世倌奏稱錢永興十世單傳兄弟二人一死
一抵宗祀斷絕情屬可憫應否改爲應斬監候等語朕思從前所
辦弟毆胞兄致死之案許其存留承祀原屬法外之仁但必其情
罪甚輕實無干犯抵格情形而邂逅致死者方許酌量擬議請旨
則罪當而恩不濫施若但家無次子不論罪案之重輕槩准承祀
則將來獨子有犯皆不得治罪借如獨子不孝父母致毆其父母
父母親告亦得謂延其宗祀而竟置之不問乎蓋承祀之條所以

重絕人之嗣而此等兇惡之徒弗念天顯於情理萬無可恕國家寬大之恩本不爲若輩而設卽令殄絕宗祀亦彼自絕於天而非國法之絕之也况伊古以來史冊所載聖賢卿相無後者不一而足海內良善之人亦不能使之人人有後而獨於罹扞重辟之輩展轉委曲廢國家一定之法律爲之請命獨何心哉卽以彼一家而言其兄之無罪而死者旣無後矣厥弟逞兇應死反必爲之立後於情殊爲不平如錢永興十世單傳至伊始有兄弟兩人實亦形影相弔苟稍有天良念先世嗣續之重不特弟不可干犯其兄兄亦當友愛其弟使錢永興所犯卽屬毆死乃弟亦不可不繩之以法而况毆兄致死尙何一縷之可原乎若謂活一二兇惡之命卽爲陰德此所見與婦人女子何異就使果有陰德而戴德者不過一二兇惡應死之犯將來愚不肖相率效尤身陷大戮皆所言

賁階之厲流禍之與種德果孰輕而孰重耶朕於刑名重案愼之又愼必求其生而不得方置之典刑而於情罪重大者不敢遽道以干譽至於倫常所在關係天理民彝飭紀明刑豈可任意姑息總之因物付物不設一毫成心未嘗有意從寬亦未嘗有意從嚴欽哉惟恤所望諸臣共襄明允之治嘗聞皋陶曰殺之三堯曰宥之三皋陶不專指刑官凡議獄者皆有皋陶之責若下有宥之三之皋陶則爲君者亦不得不爲殺之三之帝堯矣此案已照九卿所議完結因大學士陳世倌之奏宣諭此旨使中外司刑者共知之○駐藏副都統傅清奏據頗羅鼐呈稱本年三月派人探望準噶爾做善事回巢蹤迹據回告越過阿哈雅克卡座到噶斯路上探得準噶爾人等回巢路上人畜多有死傷情形艱窘又拉達克汗策卜登那木扎爾等寄信內稱從前葉爾羌人等每年到我所

屬地方貿易自準噶爾熬茶以來一年有餘不見有人來此貿易因遣二人前往薩納珠口探信據伊等回告準噶爾部內墨得格齊巴圖魯宰桑等出痘死者十三人屬下出痘死者甚眾噶爾丹策零畏懼向從前奪取哈薩克游牧之北地方藏避又準噶爾所屬吉爾吉爾頭目二人不和內頭目甘班圖伯克殺死一頭目併據其地修造薩瓦爾格里雅城劫奪往來買賣人等後噶爾丹策零避痘回巢派兵三千名進攻吉爾吉爾薩瓦爾格里雅城將吉爾吉爾之甘班圖伯克殺死屬下人等俱帶至厄魯特地方居住又噶爾丹策零遣宰桑數人向查汗薩瓦爾部落講和其見在信用之大宰桑二名一係巴爾圖之子拉沁一係策凌敦多卜之子扎克巴又有阿木賓禪汗強暴有力占據四處部落所屬有阿卜都爾噶里木部落中途又有博洛爾汗部落博洛爾汗部落內無

汗係哈屯楚哈爾辦事噶爾丹策零在阿卜都爾噶里木看視行
兵之路遣回子巴克達呼雅遜都喇呼沙巴勒賓等四十人前往
彼處人猜疑殺死三十三人惟七人遁歸噶爾丹策零愈怒派厄
魯特兵二萬四千哈薩克兵四千吉爾吉爾兵二千令伊族台吉
策卜登圖拉爾滿積圖拉爾袞都爾圖拉爾於本年正月內起程
前往但聞阿卜都爾噶里木汗力量充足兵丁強健勝負未知如
何報聞○李學裕卒調陳惠榮爲安徽布政使以愛必達爲貴州
布政使由郎中遷○丁丑申諭疆吏詳慎獄獄○貴州總督張廣泗奏
夏如春等結黨謀逆飭文武各官上緊躡緝夥黨得旨欣悅覽之
卿自能辦此事也西南保障卿實堪當至於苗疆更無出卿右者
因思無人學習恐新手難繼其後今用愛必達爲貴州布政使此
人以朕視之甚可造就卿其盡心指示作成之卽將來別有用卿

處亦有人當此巖疆方面矣○戊寅雙喜年老休致調蘊著爲盛

京戶部侍郎以勲滿岱爲盛京工部侍郎由副都統遷○晏斯盛乞終

養允之以開泰爲湖北巡撫鄂容安署兵部侍郎由祭酒署○己卯定

駐藏官兵三年換班例○壬午 上以準噶爾噶爾丹策零死命

西北兩路邊卡慎固防守○甲申冊封純妃蘇氏嫺妃那拉氏爲

貴妃愉嬪海氏爲 愉妃 貴人魏佳氏爲 令嬪○丁亥准

福建葺總督姚啓聖祠○己丑免安徽宿州等二十一州縣漕糧

積欠○禁吏員僭用章服○是月慶復等奏馬良柱攻克直達熱

泥擦嗎擦牙等處百十餘寨內投出邊多土目丹批擒獻夾壩二

名李質粹自東俄洛移駐章谷宋宗璋與總統不睦李質粹改令

赴噶多進攻或再觀望卽當參奏四朗所屬各寨先惟阿斯羊雀

二處未經投誠見俱招撫報聞

十二月辛丑大學士等議覆雲南總督張允隨奏金沙江通川河道開濬完竣化險爲平惟上游之蜈蚣嶺等十五灘因極險未議開濬請一併開通以免盤剝之煩應如所請仍令該督確查果否一勞永逸詳慎辦理得旨依議速行○甲辰除河南祥符等七縣葦地丁糧○丁未命湖南新舊苗疆照內地一體普蠲新聞長安營官田免租十分之三○戊申諭國家崇報之文明禋肇薦考議周詳凡祀典所關羣神咸秩卽如雩祭諸禮事繫農桑近復議行有舉無廢皆以爲民也邇年以來諸臣工每以蜡祭爲請朕追維舊制酌古準今有宜於詳慎者考大蜡之禮昉於伊耆三代因之所以報萬物之成也雖詠於詩詳於禮記周官而古制屢遺傳注參錯難以折衷所謂八蜡配以昆蟲後儒謂其害稼不當與祭月令祈年於天宗蜡祭也註云日月星辰則所主又非八神至謂合

聚萬物而索饗之其神甚多尤難定位且蜡與臘冠服各殊有謂臘卽蜡者有謂蜡而後臘者是古制已不可考終無定衡至於後世自漢臘而不蜡此禮已湮魏晉以降迄於唐宋時行時止或溺於五行之說甚且天帝人帝及於龍麟朱鳥多至百九十二座議者以爲失先王之禮遠矣蘇軾曰迎猫則爲猫之尸迎虎則爲虎之尸近於倡優所爲是以子貢觀於蜡言一國之人皆若狂以其沿習日久迹類於戲也蓋祀於南郊已不合於古制而蜡於四郊則惟順成之方始祭較量區別叢雜瑣細於義有乖於禮未洽於神爲褻自元明以來停止此典實有難於舉行之處况蜡祭諸神如先嗇司嗇日月星辰山林川澤今皆祀於各壇廟原於典文無缺卽民間秋成之後休息農功祀神報賽大抵借蜡之遺意以盡其間并歡洽之情猶有吹豳擊鼓之風亦皆聽從民便未嘗禁止

是蜡祭原行於民間但田夫萃處雜以嬉戲各隨其鄉之風尙初
不責以儀文若朝廷議祀潔蠲虔享必嚴肅整齊何至有一國若
狂之論可知此祭卽古亦閭閻相沿之舊俗詎可定以爲郊廟典
禮如以爲有所無報則方春而祈穀冬又有事於 圓丘禮謂郊
之祭爲大報天又云萬物本乎天大報本也豈得謂之有所無報
乎况二仲薦馨並崇社稷班固所謂爲天下求福報功者具在陳
祥道所謂大社國社農之所報在焉今 社稷壇春秋兩祀祈報
之禮已備至義近於重複事涉於不經者卽下之禮臣亦難定議
因諸臣但泥古制多未深考是以特降此旨俾共知之○庚戌莊
親王允祿等奏遵旨詳審周禮六樂清濁同均之理謹按禮記月
令鄭康成註云日月之行一歲十二會聖王因其會而分之以爲
大數觀斗所建命其四時又周禮六樂註亦以斗建日躔爲說則

六合之義由來久矣至賈公彥疏云奏據出聲而言歌據合曲而言唐宋以來無有能辨其譌者夫和聲依永自古爲然若歌奏合爲一均則聲不依永律不和聲必不可以爲樂伏讀乾隆七年正月二十八日諭旨歌奏各爲一事曠若發蒙伏查儀禮燕禮鄉飲酒禮並云工歌鹿鳴四牡皇皇者華卒歌笙入奏南陔白華華黍則歌奏各爲一事經有明文方其歌時未嘗奏也及其奏時未嘗歌也歌自歌奏自奏聲調未嘗相妨義理自然相合正如斗建左旋日躔右轉時行物生有相成而無相礙也古人用樂制不可考臣等不敢妄議而據經論樂則誠如 聖諭義蘊深融無所爲礙雖施行者矣請敕發三禮館昭揭經義永迪來茲得旨朕從前上諭原爲律書而發今莊親王等請敕發三禮館著交與大學士張廷王尙書高斌閱看所發上諭是否允當並應否頒發三禮館之

處一併具奏尋奏伏查周禮樂制註疏家聚訟繁多不可深考惟儀禮所載燕射諸禮工歌合樂之節甚詳蓋歌者人之聲奏者樂之節也故陳氏樂書曰工歌則琴瑟以詠而已笙不與焉笙入則象笙而已歌不與焉歌之與奏其爲兩事無疑又夾漈鄭氏曰古者歌鹿鳴必歌四牡皇皇者華故曰工歌鹿鳴之三用南陔白華華黍三笙贊之然後節奏有屬歌自爲歌奏自爲奏顯然明白自唐賈公彥溷歌奏爲一事以致說經者隔閡難通我皇上履中蹈和聲律身度闡康成之說則前人之未詳者於今益詳指賈疏之譌則後儒之沿誤者爽然無誤臣等祇誦之下渙然冰釋怡然理順敬謹尋繹義蘊昭融實足以補經義之所未備允宜如莊親王等所請敕發三禮館纂入成書垂教萬世查三禮義疏原纂體例敬採 御製日知薈說樂善堂文集內論及三禮者彙爲 聖

製一門冠於卷首今應將欽奉諭旨纂入其本篇各有案語應將莊親王及臣等奏帖中語意融洽採取以廣發明俾研經習禮之家共知 聖訓昭垂實爲千古定論則教澤之所被更無窮矣從之○辛亥大學士福敏以老病乞休優詔允之加太傅○壬子諭軍機大臣等瞻對用兵一事十一月二十四日接到慶復十月初六日奏摺略悉彼地情形此後便未見再奏且伊奏內稱中路班滾賊巢隔江難進惟俟南北兩路兵到來攻使班滾反顧方可進兵而北路又復險阻難進議於寨後再爲加兵夾攻等語卽奏報克捷亦止焚毀碉樓數座殺傷賊徒數人其餘大率逃入箐中未見有覆巢壓卵之勢今賊勢頗眾素性狡猾異常天兵壓境尙敢負險拒敵看此情形似難剋期剿滅此番進兵原期殲滅根株爲一勞永逸之計若草率結局不但國體攸關且將來又費周章矣

爾等可密信與慶復等令其酌量情形若果難於制勝李質粹似
當領兵前進以壯聲援其李質粹所駐之處卽令慶復前往駐紮
就近調度若需添兵前去卽將滿兵帶去數百名亦可朕意如此
令伊等卽速妥議總以萬全妥速克奏膚功爲要一面辦理一面
奏聞並將近日情形詳悉速行具奏○命慶復爲文華殿大學士
仍留川陝總督任以高斌協辦大學士○甲寅工部議覆協辦大
學士劉於義等奏會勘直隸水利河道應修應濬事宜一還鄉河
隄卑薄淺缺處請加修築許家橋等處加展月隄河身狹隘河形
屈曲處加開寬闊裁灣取直果園廠兒莊各建滾壩一座壩下開
引河一道一寶坻城內薊運西隄並袖鉞舊河宜分別修築張青
口以下宜接挑支河以分淀河水勢一新安縣新河宜開挑寬深
並將歸淀河路一律疏濬四工閘中建砌涵洞一唐完滿城三縣

境內前議每五里設涵洞一座今相度地勢應酌量開建不必拘
五里一座至方順橋之通會閘宜加高保定府之保城河宜挑深
唐完滿城清苑各縣境內應建大小木石等橋共三十五座一慶
都以下沿白草溝河至清苑安肅宜開濬道溝並建閘座木橋一
廣利依城二河宜挑減河分洩水勢定興安肅泉水宜疏濬以廣
灌溉均應如所請來歲春融動項興工從之○乙卯諭高斌蔣溥
俱著在軍機處行走海望精力漸不如前且所辦事務繁多不必
兼軍機處○調勵宗萬爲刑部右侍郎以涂逢震爲工部左侍郎
張若藹爲內閣學士由通政使遷○己未命增培江南黃河南北兩大
隄月隄○辛酉 欽定朝會燕饗樂名元旦中和樂升座元平還
宮和平冬至中和樂升座遂平還宮允平 萬壽中和樂升座乾
平還宮泰平上元中和樂升座怡平還宮昇平常朝中和樂升座

隆平還宮顯平內廷行禮丹陛樂雖平諸王百官行禮丹陛樂慶
平外藩行禮丹陛樂治平 皇太后三大節中和樂升座豫平還

宮履平丹陛樂益平 皇后三大節中和樂升座淑平還宮順平

丹陛樂正平○壬戌召趙城來京以嚴瑞龍爲河南布政使王師

爲直隸按察使

由清河道遷

○兩廣總督策楞奏安南夷匪莫康武等

初止竊踞夷境之文蘭驅驢等處茲據沿邊稟報夷境之處東處

南宣光清化安廣太原等郡俱爲莫康武所有以莫登庸子孫復

讎爲名所到並不殺戮凡拏獲夷目卽令招安所管之民安南僅

有處西處北力漸不支等語安南連年構兵惟有嚴我邊防示以

鎮靜加謹防範得旨所見是○是歲朝鮮來貢○會計天下民穀

數各省通共大小男婦一萬六千九百九十二萬二千一百二十

七名口各省通共存倉米穀三千五百五十八萬六千六百十三

石三斗一升有奇

卷之三

三

七

東華續錄

乾隆二十三

臣王先謙敬編

臣周瀚蕃恭校

乾隆十一年丙寅春正月庚午諭古帝王治天下之道以省刑薄賦爲先朕臨御以來愛育黎庶惟日孜孜於茲十年矣仰荷天祖眷佑海宇乂安萬民樂業朕心慶慰特沛曠典與民休息上年夏月頒發諭旨將天下正賦書免一周是閭閻已均被惠澤矣惟念各省獲罪之犯於上年句到之後見在羈禁囹圄者雖伊等孽由自作法無可寬而其中情事不同輕重亦有差別國家赦宥之典或因行慶施惠或因水旱爲憂閒一舉行今朕哀矜庶獄不忍令其淹滯囹圄所有刑部及各省已經結案監禁人犯除情罪重大及常赦不原者無庸查辦外其餘著大學士會同刑部酌量

案情輕重分別請旨減等發落其軍流徒杖以下人犯一併分晰
減等完結俾伊等同霑肆赦之恩勉圖自新之路以副朕協中欽
恤本懷○ 欽定祭祀中和樂章名 圜丘樂迎神始平奠玉帛
景平進俎咸平初獻壽平亞獻嘉平終獻永平撤饌熙平送神清
平望燎太平 方澤樂迎神中平奠玉帛廣平進俎含平初獻大
平亞獻安平終獻時平撤饌貞平送神甯平 祈穀樂迎神祈平
奠玉帛綏平進俎萬平初獻賁平亞獻穰平終獻瑞平撤饌渥平
送神滋平望燎穀平 雩祭樂迎神霽平奠玉帛雲平進俎需平
初獻霖平亞獻露平終獻霑平撤饌靈平送神霽平望燎需平
太廟時享樂迎神貽平奠帛初獻枚平亞獻敷平終獻紹平撤饌
光平還宮乂平 太廟祫祭樂迎神開平奠帛初獻肅平亞獻協
平終獻裕平撤饌誠平還宮成平 社稷壇樂迎神登平奠玉帛

初獻茂平亞獻育平終獻敦平撤饌博平送神樂平望瘞徵平
社稷壇祈雨報祀樂迎神延豐奠玉帛初獻介豐亞獻滋豐終獻
需豐撤饌綏豐送神貽豐望瘞博豐 朝日壇樂迎神寅曦奠玉
帛朝曦初獻清曦亞獻咸曦終獻純曦撤饌延曦送神歸曦 夕
月壇樂迎神迎光奠玉帛初獻升光亞獻瑤光終獻瑞光撤饌涵
光送神保光 歷代帝王廟樂迎神肇平奠帛初獻興平亞獻崇
平終獻恬平撤饌涓平送神匡平 文廟樂迎神昭平奠帛初獻
宣平亞獻秩平終獻敘平撤饌懿平送神德平 先農壇樂迎神
永豐奠帛初獻時豐亞獻咸豐終獻大豐撤饌履豐送神報豐望
瘞慶豐 先蠶壇樂迎神庥平奠帛初獻承平亞獻均平終獻齊
平撤饌柔平送神洽平 神祇壇樂迎神祈豐奠帛初獻華豐亞
獻興豐終獻儀豐撤饌和豐送神錫豐 太歲壇樂迎神保平奠

帛初獻定平亞獻嘏平終獻富平撤饌盈平送神豐平 太歲壇
祈雨報祀樂迎神需豐奠帛初獻宜豐亞獻晉豐終獻協豐撤饌
應豐送神洽豐○辛未諭朕愛育黎元格外加恩將各省錢糧普
免一次以爲休養萬民之計經大臣等酌議國家每年一定之經
費皆取資於正賦應將各省分三年蠲免則經費有賴而先後之
閒萬民均霑膏澤至於耗羨乃有司養廉及辦理公務之所必需
應令照舊輸納朕已允行今思朕之逾格蠲免天下正賦者所以
藏富於民且使閭閻之閒終歲不聞催科之聲也今正賦旣蠲而
耗羨又令完納是官民仍有交關猶不免追呼之擾若將蠲賦之
年應徵耗羨一併緩至開徵之年按數完納使小民於交官之便
完此些須不必兩次伺候於公庭亦體恤民情之意著該部卽遵
諭行並將公用不敷之處作何撥抵酌量辦理各省督撫當重率

有司善爲之勿因此又別生弊端也○諭軍機大臣等朕看近來
福建督撫光景諸事皆周學健主持馬爾泰不過依順而已周學
健急公認真固屬可嘉然諸事越俎亦非所宜若一省之事悉聽
巡撫主持則總督豈非虛設耶從前那蘇圖與周學健大相水火
有礙公事是以朕降旨將二人俱各訓飭凡督撫原當和衷共濟
然聖人云君子和而不同馬爾泰一味順從則是流於同矣可傳
旨與馬爾泰周學健當思國家設官體制勿但博和衷之名有乖
中道以那蘇圖從前較之所謂過猶不及也○諭西藏郡王頗羅
鼐素效忠誠勤勞懋著自朕御極以來一心靖共凡事俱竭力奮
勉辦理妥協殊屬可嘉著加特恩將伊子內封一長子長子係日
後襲王爵總理彼處事務之人關繫緊要著諭知駐藏辦事之副
都統傳清將朕此旨曉諭頗羅鼐在伊二子內擇一才堪繼續悅

服眾心裨益公務者保奏候朕降旨尋傳清等奏入諭前以西藏郡王頗羅鼐一心肫誠奮勉特施恩於伊二子內封一長子命伊指出其奏今據頗羅鼐以伊長子珠爾默特策布登已屬殘疾次子珠爾默特那木扎勒堪以奮勉出力伊弟兄互相遜讓並無爭競卽彼處噶布倫第巴大喇嘛等亦皆心服等因具奏應如所請將珠爾默特那木扎勒封爲長子珠爾默特策布登因從前帶兵在邊境出力會施恩封爲輔國公今雖有殘疾不能效力並著加恩加爲鎮國公該部知道○調圖爾炳阿爲雲南布政使阿蘭泰爲山東布政使○癸未實授多綸山西按察使○辛卯福建巡撫周學健奏福州府長樂縣十六都十七都二十三都二十四都四里民田七百餘頃瀕海環山水至則宣洩無餘旱乾則灌漑無術唐天寶閒邑人林鷄有田四千餘畝盡捨己田緒而爲湖以資灌

溉四里民田遂成膏腴原稅四千餘畝湖糧攤入四里民田均輸
至今四里民田帶納湖稅三分是湖皆有糧之地無庸再墾報升
自唐以後至明嘉靖年間近湖奸民先後占墾湖田數百畝至本
朝康熙初年忽報有順治九年價買湖基之照積年久遠真偽莫
辨康熙三十一年題報升科湖田三百畝遂致凡執有照者日事
壅築見在丈量湖內墾成熟田已有千餘畝占去原湖四分之一
總因此三百畝已經升科效尤影射懇敕部查明豁除其湖面凡
隄埂以內原屬林鵲所捨之田並無尺寸官荒可以懇升查照原
湖丈尺盡行剷除廣資蓄洩並立碑長禁近湖奸民壅築侵占犯
者治罪從之○癸巳諭軍機大臣等託庸參奏唐綏祖一案經總
督策楞審理所參各款有在唐綏祖未任藩司以前者有在唐綏
祖離任以後者並有非藩司所管者惟託屬員代買人墾及向屬

員取償逋欠照關防不謹之例議以革職其餘皆屬于虛朕思督撫固封疆大臣藩臬亦一省大吏儻有過失督撫原不可徇情隱庇但刻意吹求過於苛覈有乖於秉公持正之道亦大不可託庸之待唐綏祖列款糾參究無實蹟未免吹求太過爾等可寄信訓飭之○是月慶復奏李質粹咨稱移駐木魯工地處河東偏近賊番投誠中路官兵進攻底朱酌看形勢木魯工地處河東偏近河西班牙滾賊巢而河東又有甲納溪底朱臘蓋納洪多茹色等寨救援是以班滾弟兄得以併力拒守若俟勦平河東再進攻河西有曠時日今靈達投誠前途阻雪難進因移咨宋宗璋酌留官兵防守木魯工餘至中路協攻分爲四路一攻上臘蓋一攻中臘蓋一攻底朱一攻納洪多賊酋班滾乞命河西令伊母赴營叩求但該酋狡黠多端不可遽信南路馬良柱自攻克下密卡倫等處因

雪阻糧運維艱冷宗鐸病回江卡土兵散歸應添官兵令酌量派調等語查靈達投順應暫准安撫但班滾母親出叩求自當乘勢直搗如郎立擒班滾何得仍令伊母回巢見嚴飭總統速行攻剿得旨觀此則李質粹全無調遣卽如班滾之母已至軍營何以令其得回此皆失機宜之處可傳旨申飭以此觀之卿不可不親身前往以善其後也總之不可存姑息了事之念爲要務耳

二月癸卯 上幸南苑行圍○乙巳除福建閩縣等八屬漁課○

辛亥諭皇后親蠶典禮於不行親祭之年經該部議照舊例遣太常寺堂官致祭朕思從前建立蠶祠未議皇后親蠶之禮是以照例遣官今旣舉行皇后親蠶典禮若遇不行親祭之年自應遣妃內一人恭代致祭 西陵氏之神以昭誠敬爲是所有行禮位次及一切儀注應如何酌定之處著大學士會同各該衙門妥議具

奏尋奏 皇后不行親蠶之年既遣妃恭代行禮應令禮部屆期兩請具題其致祭前期齋戒二日不進銅人至其行禮位次應照先農壇遣官恭代之例設拜位於壇階下正中不設幄次升壇由西階登降除仍用 先蠶壇樂章不飲福受胙外一切贊引導引拜跪奠獻儀注俱照遣官例行再遣妃恭代行禮應令文武大臣命婦照例陪祀其需用執事女官及所用祭品由各該衙門豫備養蠶交奉宸苑蠶宮令丞率蠶母蠶婦飼養所得絲斤數目照例呈報內務府具題從之○以三月朔日食申命求言○癸丑上御經筵○甲寅諭嗣後月朔遇日食穿常服○予故大學士伊桑阿大學士贈太傅伯馬齊入祀賢良祠○乙卯諭國家立政首在得人朕留意人才以備任使而大員中尙未見濟濟之盛著大學士尙書等將可以勝尙書侍郎督撫之任者秉公舉出各自密

奏候朕採擇所舉人員不必分別滿漢亦不必太拘資格但據真知灼見以盡以人事君之義務秉公忠勿徇情面○庚申通政使雷鉉奏頃奉諭旨令大小臣工各加修省敬迓天和凡事有關於國計民生者據實陳奏伏讀乾隆十年十月內諭旨戒飭臺諫諸臣處心積慮總不外名利二途夫論臣子之分不惟不可計利並不可好名而在朝廷樂聞讜言則不必疑其計利並不必疑其好名果其言爲德爲民卽當采而納之昔孔子稱舜之大知曰隱惡揚善則知當舜之時進言者不皆有善而無惡惟舜隱之揚之所以嘉言罔伏爰成執兩用中之治也得旨雷鉉此奏朕嘉納之前謂臺諫不外名利是圖者亦謂彼一時有此習耳今則漸知省改矣若夫大舜之隱惡揚善固朕所日勉焉而未逮者也所奏知道了該部知道○乙丑諭今日因前日保舉一事欲召諸臣等面降

諭旨乃朕辦事已畢諸臣久之不至在外部院衙門尙遠近不一
至於內閣則在紫禁城內可以頃刻赴召而大學士查郎阿陳世
倌史貽直竟未入署獨不思今日朕以黎明閱視祝版而辰巳之
閒閣臣尙逍遙私第可見向來所奏每日入署辦事粉飾之虛辭
耳爾等身爲大臣當以早朝勤政進規於朕方無忝責難事君之
道而先自偷安有是理乎况三月朔日日食示儆正我君臣省愆
思過實心修省之時而諸臣怠玩若此其可垂之史冊乎朕從不
肯諉過臣下乃至此刻與諸臣相見非朕之晏朝也諸臣捫心自
問平日之言忠言孝者謂何夙興夜寐者謂何其何以自解至舉
薦人才有以爲畏者亦有以爲喜者其畏者惟恐所舉之人或有
咎戾貽累於己從利害起見固非公爾忘私之義其喜者則就此
可以市德徇私一聞降旨卽覺技癢如大學士陳世倌保舉十人

史貽直至十四人趙宏恩亦保十人夫人才實爲難得而尙書侍郎督撫職任尤重果有如許勝任之人可以簡用不盡則朕亦不必鯁鯁過計令廷臣各舉所知矣今之所舉多屬朕所素知者試略舉一二如查郎阿保德齡可勝尙書之任德齡嗜酒糊塗從前不勝巡撫之任來京授爲護軍統領武職後因其本屬文臣姑用爲工部侍郎伊嗜酒之習尙未能改在部辦事亦屬尋常卽教習庶吉士亦未見其所成就侍郎猶可姑容豈能稱尙書之職乎卽如有保阿克敦可勝尙書之任者若甚無人阿克敦實堪繼貂此薦尙書尙不謬也又保二格徐杞爲侍郎二格爲副都御史已屬勉強姑息何能勝侍郎之任徐杞爲布政使十餘年經手錢糧頗能清楚乃不自努力思京堂安逸尊榮無倉庫錢糧之責自求解任來京與范璨同一氣習蓋求其過則不得論其心則實僞所謂

鄉原也用此人爲侍郎於國事何補乎陳世倌保楊嗣璟楊嗣璟
從前差往山西審事同時於朕前痛貶喀爾吉善朕洞燭其隱直
欲得山西巡撫一席耳彼時卽向大學士等言之由今觀之喀爾
吉善豈非巡撫中錚錚者則楊嗣璟之居心尙可問乎史貽直保
吳應枚于振可爲侍郎吳應枚曾任奉天府尹辦事草率被參調
用且人亦昏庸平常豈可用爲侍郎于振文學雖或尙可觀將來
如正詹閣學之類自屬可用至侍郎則可定其不能勝任卽勝任
亦不過鄧鍾岳陳惠華之流耳於部務有何裨益乎趙宏恩保李
如蘭翁藻海望亦保翁藻李如蘭見任布政使亦屬平庸翁藻小
巧之才無大器量封疆重任豈可輕付乎李元亮保舉李世倬伊
曾任布政使甚屬不及今姑用爲京堂豈可勝侍郎之任盛安保
舉金溶金溶不過一聰明見機而行之人前爲御史時有過罷斥

朕棄瑕錄用一無建白此豈侍郎之選乎劉統勳錢陳羣俱保楮
填樁璜內廷行走其人亦未必安靜伊等同在內廷不免瞻徇之
私至雷鉉雅爾哈善二人則保之者甚多雷鉉勦襲道學陳言總
不脫好名習氣雅爾哈善自負正直器量稱小性亦偏執此等人
卽加擢用亦惟務一己虛名豈能實心任事卽如顧琮昨具奏指
謂捐納封典一事斷不可行不思康熙雍正年間開捐款項頗多
今已盡行停止惟封典係人子榮親之舉廷臣議准御史條奏允
其暫留顧琮於康熙年間卽在內廷行走嘗蒙 召見未聞摺奏
然尙可諉曰職卑至雍正年間則已擢任大僚矣何無一言及於
捐納獨至今日而沾沾以封典爲言豈顧琮學問至今日而始悟
捐納之必當停乎謂今日而必當停則其視昔時爲何時其心更
不可問矣且今日之捐納封典生俊實出於朕昔之停捐而九卿

所議存者然較之昔日之事例蓋存一二於百十耳有何輕重其
意以諫停捐納自是正論惟思邀取聲名無關國家切要之務總
由朕喜聞正言是以敷陳古道沽取美名亦屬自爲非爲國家起
見也朕從不求全責備於人其不知者亦不臆度其是非卽如所
舉有朕未知者數人已諭吏部帶領引見俟引見後亦惟徐觀其
人之當否以定保舉者之是非而已而適所論者數人則實係朕
所知者斷不可用尙書侍郎督撫之人不知汝諸臣以爲何如耳
總之保舉一事必須眞知灼見問心無愧其但顧一己利害不爲
國家留意人才已失大臣薦賢之道至邀譽市恩草率從事不論
其人之勝任與否姑舉以塞責以人事君尤不當如此存心前日
雷鉉尙謂朕宜隱惡而揚善隱惡揚善固大舜之美德朕所勉焉
而未逮但如今日保舉一事諸臣頗有以朕爲不知而可以於中

成事者朕有見於此而不言是匿怨而友其人矣朕甯爲孔子之不匿怨不能爲雷鉞之隱惡而揚善也帝廷疇咨庸違方命者不能爲之諱此豈放勳不能隱惡而揚善蓋用人之際不能與修德涵養之事一例論矣用人乃國家至要之務將來有應行保舉之時仍惟廷臣是詢此番旣確見其未當不得不爲諸臣明白曉切言之若朕言果有未協亦不妨明悉陳奏朕不自護也○丙寅春分 朝日於東郊以翌日日食停鹵簿及還宮樂○是月慶復奏李質粹移駐木魯工節據咨報宋宗璋袁士弼分攻底朱等寨雖稱燒毀碉樓數座班滾乞降並無作何攻敵情形臣咨催進攻復兩請添兵其松潘鎮等前赴納洪多等寨攻擊因官兵乏水不能久駐暫回臘蓋南路馬良柱亦未前進查南路兵威素振惟因中北兩路不能進攻眾番併拒南路見提臣調巴塘土兵前往冷宗

竄亦派土兵千名協攻臣撥建昌鎮泰甯協二屬兵赴中路協攻臣於本月至口外四馬塘暫駐與東俄洛相距百餘里俟雪消草生酌量前進得旨此事應速定局况出師已逾七月軍餉用至百萬不知李質粹等所爲何事耶宜傳旨申飭之卿其益殫嘉謀鼓勵士氣庶膚功早奏邊境永甯方不負朕委任之意若夫苟且了事以顧目前朕知卿斷不出此而李質粹等若有此意卿不可不督責之又奏瞻對軍務未竣須得一熟悉賊營形勢之人嚮導庶擒滅更易臣抵西爐訪有監犯革松結原係瞻對之喇滾副土官與班滾有仇願擒班滾報效再班滾之異母弟二班滾者前被班滾謀害其同母弟俄木丁見居賊巢亦懷怨圖報當傳明正土守備汪結詢問汪結願保革松結前往舊巢暗會伊家屬並俄木丁糾合土兵內應一鼓可擒臣因軍機嚴密卽冒昧密交汪結具領

保出前往辦理儻有疏失臣咎難辭懇敕部嚴加議處得旨此係卿權宜辦理之事何罪之有知道了

三月丁卯朔日有食之○命省釋軍流年久人犯○允石去浮回籍養親以徐杞署湖北按察使○戊辰給事中劉方藹奏前因直省城垣多缺諭各督撫留心整飭據撫臣碩色奏請分別工程一千兩以上者俟以工代賑之年動項興修一千兩以內者令該州縣分年修補除土方小工酌用民力外餘於公費項下支修夫同此城垣同此編戶固當一視同仁乃彼縣工程多者給以夫直此縣工程少者俾任空勞明明歧視此疆彼界何以平其心而使帖然服役且地方官以酌用民力之呼應艱難或寬估以就千兩以上之興修動項則工程轉致多費碩色所奏原未能周詳允協各督撫難於照辦不得已而開捐土方或官捐養廉又請按田起夫

暫借稅息紛紛摺奏在各督撫皆熟計土方小工酌用民力必不免偏累佃田之家傭力之民於勞則未均於勢則難強於事則難濟所以合羣策而不得一用民弗累民之善術也臣愚以爲酌用民力又窘於無法可設勢必至增征力役可否將州縣城垣無論工程千兩上下統令動項修補俾天下佃田食力窮民弗致苦累得旨劉方藹所奏是著照所請行○己巳召長桂來京以徐杞爲湖南按察使徐琳爲湖北按察使由山東登州府還○乙亥準噶爾台吉策妄多爾濟那木扎勒遣使哈柳進表至京表曰蒙大皇帝加恩我父內外和好我父因仰體大皇帝宣揚黃教奠定蒼生之意恭順遵循今我父已故竊欲勉繼父志照舊行事以承恩典見擬遣人往西藏念經爲我父修行善事循例先遣數人輕騎前往懺悔獻茶而同繼令念大經人眾進藏以宣黃教伏祈大皇帝

睿鑒謹遣使臣恭請萬安並貢貂皮四十一張報聞○丙子諭據大學士慶復奏稱瞻對用兵中路總統建昌鎮總兵袁士弼以招降爲事雖屢經據報攻克多寨而逆酋班滾尙未授首經臣親行出口始知其所報之處俱不著實請將袁士弼革職留任並革去總統仍帶原領官兵實力效用等語總統爲領兵大員須同心共濟奮勇當先方稱任使袁士弼旣觀望於前復又捏飾於後著革職並革去總統姑從所請仍留總兵之任效力贖罪至北路總統松潘鎮總兵宋宗璋始雖意在招降後能聽從調遣姑免處分令其協力進攻以觀後效若再因循推諉卽行參奏提督李質粹三路總統俱其管轄乃隨聲附和漫無可否實負任使之責著傳旨嚴行申飭卽令其統領各路官兵會合擒剿速奏膚功如仍有瞻顧怠玩之處朕不姑貸也○戊寅工部議准直隸河道總督高斌

奏直屬水利工程應乘春融興舉各事宜一天津塌河淀之東有舊河形一道至甯河縣七里海長三十餘里七里海之東亦有河形一道長十九里餘直達薊運河應一併開挖引流歸海一津城東北一帶瀝水由高家嘴經宜興浦燕家口賈家口入於海河年久淤塞請就舊有河形開挖一靜海縣蘆北口一帶地勢低窪雨多苦潦土性斥鹵乾旱又苦無水請於蘆北口接挑河渠庶村莊瀝水俱有去路一南運河捷地汛宜改挑引河以免減壩分溜過多之患得旨依議速行○己卯命浙江玉環山田及海口沙地同正供一體普蠲○辛巳免雲南官莊義田等項租息銀十分之三○飭各省清釐積案○遣內大臣班第努三等赴瞻對軍營○壬午賜準噶爾使臣哈柳等宴上召見哈柳諭曰朕覽爾新台吉奏章欲效法伊父體朕宣揚黃教奠定蒼生之意冀承恩典朕甚

嘉悅爾老台吉比年以來甚屬恭順遵循朕旨是以屢加恩眷今
已病故深爲軫惜爾新台吉又爲伊父懇請遣人往西藏念經行
善事乃理所應爲朕自當准其所請但作爲兩次前往事覺繁瑣
且爾等進藏之人艱於跋涉當已深悉不若作一次前往爲妥朕
仍加恩照前賞給牲畜口糧中途資助且爲爾老台吉作布施禮
及施恩賞賚之處交大臣等查辦豫備俟爾同時齋往哈柳跪奏
大皇帝之旨大人等先經曉諭今又面聆 聖訓俟同時當告
知我台吉敬謹遵行 上特賜玉如意一支謂哈柳曰此名如意
乃克遂心願之謂特賜與爾新台吉者爾可齋往並命賞哈柳玉
如意一支哈柳叩頭祇領 上親賜酒三爵哈柳跪飲而退○癸
未諭田懋朕因其爲大學士田從典之子加恩擢用至吏部侍郎
乃秉性輕浮言語不謹在朕前所奏之事常洩漏於外且嗜酒務

博不自檢點少年而不老成執袴之習至今未除豈可以居卿貳之首著解任回籍令其閉戶讀書交與該省巡撫管束不許出外生事儻日後改過自新朕再加恩錄用○諭刑科給事中程盛修一摺內稱六部司員有從州縣行取推升者其中不無可用之才俾以理繁治劇似屬駕輕就熟請於此等人員內簡用知府等語夫知府一官承上接下最關緊要朕無時不加意選擇至於行取知縣一途朕留心體察大抵偏僻小邑並無參罰案件以及中等謹慎人員該上司遂爾保送者居多其實有卓越之才者見在必膺繁劇之任轉未免有處分案件而該督撫亦必留於本省以備臂指之使此等情形朕知之最悉年來並不以行取爲要者職此之由餘著該部議奏○工部侍郎范琛年老休致○甲申賜準噶爾台吉策妄多爾濟那木扎勒敕書曰朕總理天下無分內外一

視同仁惟期普天生靈各得其所台吉爾奏稱遵照爾父仰體朕
廣教安生之意朕甚嘉悅前爾父仰知朕意定界以來敬謹遵奉
諭旨朕屢次加恩體恤今聞溘逝深爲軫惜爾奏稱遣人往西藏
諷經先輕騎減從前往懺悔熬茶同時令諷大經人等續往諷經
等語爲爾父懺悔諷經理所當行豈有不准但分作二次徒覺繁
瑣爾之人行走艱難爾亦知之當一次同往爲安朕仍照前施恩
派人照看賞賜牲畜路費又爲爾父作布施禮特恩賞銀滿達茶
桶察喇各一紅黃香一百束交與使臣哈柳帶往又大手帕百條
小手帕千條茶葉千包令爾諷經之人往藏時由邊界支取應往
人數何時起程何日可至邊界先期豫行報明又爾使臣哈柳口
奏延請西藏喇嘛及今年例應來京貿易之人祈就近在肅州貿
易二事延請西藏喇嘛前據爾父奏請時朕卽以不便准行明白

降旨矣至今歲貨物欲於肅州隨便貿易此可行之事准爾所請
交與該地方官照看貿易台吉爾一切事務惟當遵照爾父仰體
朕廣教安生之意敬慎奉行互相和好愈敦信實俾邊氓永享安
樂特敕交使臣哈柳齋同隨敕賜爾各色段十端蟒段粧段各八
端玻璃鏡器琺瑯器皿十八事爾其祇領○乙酉轉蔣溥爲吏部
左侍郎以歸宣光爲吏部右侍郎王會汾爲兵部侍郎由內閣學士遷○
以尹會一爲工部侍郎命俟服闋來京赴任○丙戌諭軍機大臣
等瞻對一事前因慶復紀山奏請用兵以爲一勞永逸之計朕是
以允行今遣發兵丁已陸續增至二萬有餘兵餉已撥至百餘萬
兩自去年七月進剿至今春已歷九月兵眾糧多曠日持久尙未
奏厥膚功先次奏報焚毀碉樓殺傷賊徒及慶復出口密加體察
知李質粹等所報之處並不著實多係捏飾慶復不爲隱諱據實

奏奏此處可嘉但見據慶復又以添兵爲請並奏稱五六月閒務期必克不知慶復果有真知灼見否近有人奏稱賊番所居碉樓或在山頂或居山腰地勢險惡牆垣堅固藉此抗拒官兵我兵難施技勇不知見在彼地情形果如此否朕思瞻對不過一隅小醜耳卽盡得其地亦無改爲郡縣之理可密傳諭與慶復彼地見在情形果能如伊所奏五六月閒全竣軍務否如若不能剋期奏功又將如何布置著伊通盤籌算悉心計議一一具奏不可勉強一時亦不可迴護前說也尋奏查瞻對恃其碉樓礮石肆無忌憚前此官兵初到未諳攻法近攻克兆烏石甲納溝等處勢如破竹俟納洪多溝口碉寨一克卽可直趨如郎逆酋班滾窮蹙其異母弟俄木丁並從前投誠之上瞻對頭人騷達邦喇嘛甲爾溫布俱願效力暗爲嚮導臣已密令土守備汪結由茹色過江接應大兵搗

其巢穴五六月閒必能克取再臣出口以來留心訪查番類不一
地方遼闊事平後駐兵設營亦屬無益當仰遵訓諭盡心籌畫以
期久遠甯謐得旨卿所見自有成竹足慰朕懷然善後之事不可
不豫籌也○丁亥 上親耕藉田○戊子以沈德潛爲內閣學士
由詹事選○庚寅御史朱續經奏法司衙門會覈之案有兩議並陳者
主臺衙門或另備夾片申明前議之是指駁後議之非迹涉爭競
有關政體主臺之臣所見果確何妨卽以夾片所陳再同在議諸
臣平心商榷在異議者亦當心折或往復論議其言果有可採主
臺者亦當屈己聽從共期平允不必存獨是之見請自今會議之
案開有異說務於進本前各盡己說平心商榷彼此不存獨是之
見儻必有不能盡一則兩議並陳靜候 聖裁不得另加夾片豫
爲申說得旨此奏是著照所請行○辛卯諭從前交部議覆事件

科道等官往往不待部覆紛紛具奏甚屬非體經鄒一桂陳奏比時朕已降旨訓諭諸臣並令嗣後議覆時將條奏意見參差之處聲明請旨昨據張允隨陳奏卡瓦一事朕已交議政王大臣速議乃未經議覆之先御史彭肇洙卽行陳奏以爲事不可行前一日少詹事瑛曰修亦爲此言是從前攙越瀆奏習氣至今未改也人臣從政有體進言有序分職宣猷者廷臣之事也繩愆糾繆者言官之責也卽如一事旣已交議卽應候其覆奏待朕降旨若廷議未當而朕旨允行不妨據所見再行陳奏亦未爲遲朕不難收回成命以從之此時廷議未上朕旨未下則有何愆可繩何謬可糾而豫料廷議之不當爭先入告竟若迫不及待者然若果各據所知與其拾遺於事後毋甯匡正於未行亦未爲不可但此案朕聞議政處率以爲不可行矣則是人所共知之事何待亟亟敷陳乎

若不訓飭則徒滋紛擾非政責有恆辭尙體要之意也彭肇洙摺
並發○壬辰裕親王廣祿等議覆雲南總督張允隨奏永順東南
徼外卡瓦葫蘆酋長蚌筑稟稱其地有茂陸山廠礦砂大旺內地
民人吳尙賢赴廠開採議給山水租銀不敢收受情願納課作貢
等語查卡瓦遠居徼外獻礦投誠自宜准其歸附但止取慕化之
肫誠何計貢獻之有無應令該督將在滇夷目人等善爲撫綏曉
諭大義令其回巢至吳尙賢以內地民人潛越界外開礦並該管
官失察之處均干例禁應查明具奏從之○甲午申禁民人出山
海關○增設貴州各塘汛弁兵○是月湖南巡撫楊錫紱奏楚南
嶽麓書院離城十餘里中隔湘江春夏水長士子多因畏涉不肯
肄業書院秋冬水退亦皆因循不往臣查宋時有城南書院與嶽
麓並稱業已廢爲僧舍城南有長沙協都司舊署臣等各捐廉修

葺卽改爲城南書院見將舊在嶽麓書院各生遴選入內肄業俟仲秋後仍歸嶽麓歲以爲常得旨好書院之設惟在育才不在美譽此意不可不知○慶復奏軍營情形得旨朕日夜望卿奏摺覽奏始略悉梗槩矣卿所云五六月間必成功者想卿胸中自有成竹乎抑亦約略言之乎瞻對之役朕本無興兵之志皆汝等守土之臣以爲必當爲一勞永逸之圖今永逸尙未可必而一勞已太勞矣若果如此奏則尙可謂收之桑榆若復尾大不掉朕與卿等皆不能免嘉兵勤遠之譏矣奈何慎之勉之

閏三月丁酉朔命陝西修護列代陵墓○命山東河南運麥十萬石來京備用○律呂正義後編書成 御製序曰 皇祖聖祖仁皇帝建中和之極通聲氣之元 欽定律厯淵源一書審推步以明象緯研數理以備成法至律呂正義凡所以定尺考度制器審

音與夫五聲二變應和之原析其精微區其謠舛古樂之大義明而千古有定論今樂之至理具而千古有正聲誠所謂惟聖人能之者顧七政授時九章布算至今遵循罔敷而律呂尙未暇施行太常之司和聲之署習其器而不能究其所以然遂並其所習者而失之襲謬承訛不協不度篇章音節非重爲釐正不可和碩莊親王親承皇祖指授貫徹樂義尙書張照研窮律本博習往訓因命協同考正朕親加釐定爲器爲音爲宮爲調聲之高下節奏之短長分劑而節比之合則仍其故不合則易其辭更其調或出自臣工撰述或出自幾暇親裁必考義理之原究制作之本夫而後郊廟所陳朝會燕饗所奏律呂各得其宜歌奏不淆其序八音克諧無相奪倫矣爰銓次成編俾垂永久更參稽前代因革損益之異爲樂器考樂制考樂章考度量權衡考以備律呂之

條貫復推闡爲樂問三十五篇以申明其旨趣於是而 聖祖之所爲審音定樂制器協均者一一施諸實用自漢魏以迄元明是非得失之故瞭然可述名之曰後編者實以徵 皇祖天縱聖神通極造化千古作者無能出其範圍亦無能窺其涯涘至於繼述先緒則在我後人益憂焉而弗敢忘○戊戌工部議覆協辦大學士署直隸河道總督劉於義等奏續勘慶雲鹽山二縣疏濬事宜一慶雲縣滙水俱賴馬頰河宣洩應與山東樂陵海豐等縣交界之處並大巨河入海河道開挖寬深一慶雲縣城北應從趙魁斗莊經高橋賈家莊白廟海子王家窪王可莊等處開渠一道引水入老黃河以爲歸宿並於窪口築高添設涵洞二以防黃河倒灌一慶雲縣高寨窪應照舊挑挖深通引水入老黃河以消積潦一慶雲縣四鄉民溝十六處前經勸民開挖疏通今紀家鋪北

等七溝見在深通無庸挑挖外其後馬家莊等溝九處或照前開
挖或應接長開挖分別引水入老黃河亭子河及無棣溝等處均
應照議開挖並應建設木橋二以便行旅一鹽山縣宣惠河前經
挑濬但河身尙淺應再加挑深務期通縣瀝水悉歸老黃河至東
省海豐縣應挑河道俱令鹽山縣督率一律挑濬一鹽山縣東之
明泊窪西北諸水俱匯於此無路宣洩窪內地五百餘頃每致淹
沒應挑洩水河一道由釣魚臺程村橋起通至宣惠河俾歸老黃
河並將程村橋一律修整從之○己亥白鯉山以陳家浦漫口辦
理不善革職以顧琮署河東河道總督劉統勳署漕運總督○甲
辰以莊有恭爲內閣學士原任光祿寺卿○己酉以張師載爲左通政調
黃岳牧爲江西按察使以孫紹武爲貴州按察使由古州道遷○癸丑
杭奕祿以老病致仕以阿克敦爲左都御史由吏部侍郎遷○丁巳重修

明通鑑綱目書成 御製序曰編年之書奚啻數十百家而必以朱子通鑑綱目爲準通鑑綱目蓋祖述春秋之義雖取裁於司馬氏之書而明天統正人紀昭監戒著幾微得春秋大居正之義雖司馬氏有不能窺其藩籬者其他蓋不必指數矣嘗謂讀書立言之士論世爲難非如朱子具格致誠正之功明治亂興衰之故其於筆削鮮有不任予奪之私失褒貶之公者自綱目成而義指正大條理精密後儒有所依據踵而續之由宋迄元釐然方策至明代君臣事蹟編輯之難更倍於諸書蓋明史已成於百年之後而世變風漓記載失實若復遲待將何以繼續編而示來許爰命儒臣法朱子通鑑綱目義例增損編摩大書以提要分注以備言每一卷成呈覽朕於幾暇亦時御丹鉛爲之參定雖於天人一貫之精微未之能盡而惟是謹嚴之義守而弗失簡正之旨志而必勉

書既成羣臣舉唐太宗之事爲言勉從其請而爲之序云○己未
上詣 黑龍潭祈雨

夏四月己巳以介福爲內閣學士

由太僕寺卿遷

○庚午命慶復約束四

川三齊等三十六寨新附番民

○辛未王芥園因病解任以唐綏

祖爲山東按察使

原任廣東布政使

○壬申命修山西大同等八州縣城

垣代賑○癸酉

皇七子永琮生○濬江蘇海州等屬河道○己

卯吏部議奏廣西巡撫託庸於鼓鑄銅斤一事從前奏請三七抽
課屢經奉旨詢問以爲事屬可行及至試行八月不能有效復請
照前辦理而價值更爲增多始則有意更張繼又迴護已短巧爲
掩飾全無大臣之體殊屬溺職應照例革職得旨託庸著革職廣
西巡撫員缺著布政使鄂昌署理布政使員缺著按察使李錫秦
署理按察使員缺著湖南驛鹽道鍾昭署理○庚辰改湖南永順

辰州兩協仍歸提督轄○甲申命安插歸化城就食貧民○乙酉諭向來江西省每逢編審之年丁男之外又有婦女蓋緣從前有鹽鈔一項分給小戶計口納鈔既有婦女應徵之項則不得不稽其存亡增減是以入於編審之內也今食鹽課鈔久經攤入地糧而該省尙循舊例辦理朕思從前照鹽納價編審尙屬有名今鹽鈔既已攤入地糧之內則是婦女已無應徵之項何必存此編審虛名徒滋擾累嗣後編審婦女之處著停止○丙戌大學士兵部議准雲南總督張允隨奏順甯府屬猛緬長官司奉廷徵父子獲罪革審其親支內無可承襲之人據猛緬五十村寨夷民僉稱向被土司殘虐民不聊生懇求寬立流官應俯順夷情將猛緬土司裁汰所管地方改設流官管轄從之○癸巳雨○是月陝西巡撫陳宏謀奏陝省爲豳岐舊地蠶桑之事自昔爲盛日久漸替查西

同鳳漢邠乾等府州皆可養蠶近令地方官身先倡率廣植桑株
雇人養蠶並於省城置機覓匠織縑此次進呈之縑即係省城所
織民間知種桑養蠶均可獲利今年務蠶桑者更多計通省增種
桑樹已及數十萬株從此漸加推廣陝省蠶桑之利可以復興其
山東放養山蠶之法已令各屬導民試養得旨興農桑乃爲政之
要務毋始勤而終怠毋空言而行違勉之○慶復等奏督兵連克
脈隴岡曲工山梁上谷細等處賊寨又攻克納洪多溝口由茹色
會合渡江已破如耶大寨班滾攜家逃遁飭各路嚴密擒獲班第
等卽於是日到營招撫遺番乞降甚眾得旨覽奏曷勝欣慰但班
滾未獲究未可謂成全功卿其督令務獲正犯慎防假冒之弊其
一切善後事宜卿其詳酌悉心妥議具奏

五月丙申朔以盛安爲左都御史

由刑部
尙書遷

阿克敦爲刑部尙書調

雅爾圖爲吏部右侍郎勒爾森爲刑部左侍郎

由禮右調

○丁酉大學

士等議覆協辦大學士吏部尙書高斌奏黃淮爲川澤歸宿開壩
實黃淮門戶過蓄則盈過洩則虧宜斟酌定則查清黃二水每遇
伏秋盛漲總以老壩口水誌爲驗應酌定以乾隆七年最大水誌
連底水一丈四尺七寸爲準令河臣將每年水勢較量奏報其各
處開壩附近水誌黃河則有徐州城外石隄可驗清河則有洪湖
山盱石滾壩可驗以此較量酌定啓閉各工俱有遵循如黃河南
岸碭山縣之毛城鋪壩洩水由洪溝河入淮下達五湖匯入洪澤
助清刷黃近年多開少閉以致淮河一帶民田受淹今應俟徐城
石隄連底水長至七尺始開秋汛過汛卽閉其壩外引水支河四
道止留三道內蔣家營一河河頭直順應改爲倒勾從前太順之
口門並應堵塞又王家山天然閘原爲分洩盛漲以保徐城近亦

經年不閉以致蕭縣宿州地方常被水患今應俟徐城石隄連底水長至八尺始開漲退卽閉至睢寧之峰山四閘地近洪湖不宜多洩且在徐城之下不遇異漲無庸開放至黃河北岸如宿遷縣之竹絡壩引黃入運原爲中河水弱時濟運非爲洩黃而設近亦經年開放是以黃水灌入中河轉入運鹽河致海州一帶河道淤淺此壩口門原寬六丈餘應收二丈餘其內外臨黃東黃二壩亦一律收小酌定每年十月東省煞壩後始開至來歲重運過完卽閉其清河縣之王營減壩洩水入運鹽河東安縣之馬家港洩水入民便河俱洩水無多非遇異漲不得開放又中河之劉老澗壩洩水入六塘河每遇水漲六塘河有駱馬湖水盈注不能容納外水亦不得常時開放至清水則以洪澤一湖爲灌輸蓄納之地其洩水之處山盱三滾壩外如盱眙之蔣家閘由金釵罕貽等澗直

抵高郵老湖久經堵閉上年居民請開民情甚便自不必常閉但恐宣洩太過湖水有虧應以洪湖水長與山旰南壩相平始開一不過水卽閉其南北天然二壩向係用土堵閉臨時挖開過水上年南滾壩過水二寸將天然南壩放開初開僅三十四丈後刷寬四十四丈壩下溝深尺餘水落後堵閉糜費不貲且減洩太過湖水受虧今應俟南滾壩過水三尺始將上壩開放南滾壩一平卽閉又運口分淮入運水勢不宜過大每遇水長高寶一帶水卽盈隄由運口草壩口門太寬今酌定四尺爲度並將二壩三壩一律收小其南壩壩墩斜長重運輓行不便應酌改作磨盤式總之黃水宜合不宜分清水宜蓄不宜洩臣詳勘河湖水勢通盤籌定至形勢偶遷因時損益則在司河者相機斟酌均應如所請臣等並查老壩口爲清黃交會之處其清水實在水勢必就洪湖隄身較

量方能驗度有準應令河臣於地勢最低之古溝龍門壩六安溝
高家堰等處立定水誌照式奏報至運河之水係湖水分入不應
較湖水爲渾於運道甚有關繫亦應令河臣將水色清渾並一年
內黃水有無倒灌及灌入次數時日或係東北風起或係黃水盛
大實在情形俱於奏報水誌時一體奏報得旨依議速行○免臺
灣官莊租息銀十分之三○戊戌截漕糧十萬石於山東備糴○
壬寅免山西大同等十八州縣應徵耗羨○甲辰諭勵宗萬前在
山西巡察任內居官不謹已經廢棄蒙 皇考天恩棄瑕錄用至
於大員乾隆元年朕簡用爲侍郎又因徇私濫舉經部議革職閒
居數年朕仍念其爲大臣之後復加恩用至今職冀其改悔前愆
亟勉效力今覽大學士等審訊沈文傑行賄作弊一案內稱勵宗
萬職私未受形迹顯然而聽許之處眾供確鑿應將勵宗萬照例

革職杖一百徒三年等語朕細閱此案情節見在實未得財而知
勵宗萬平日之爲人將來事後酬謝伊斷無不收受之理朕此諭
旨令勵宗萬捫心自問不切中其隱微乎但朕思伊之所以敢於
踰越規矩不守官箴者固勵宗萬之罪而其間亦尙有故蓋因朕
前歲纂修祕殿珠林一書張照梁詩正薦勵宗萬等在懋勤殿行
走編輯朕或召見講論書籍勵宗萬遂恃此虛張聲勢縱放自恣
朕不會早加誡飭以致罹於罪愆今勵宗萬縱容伊弟門客招搖
生事受託行私已犯革職之條著革職從寬免其杖徒令回原籍
閉戶讀書餘依議○以魏定國爲刑部右侍郎潘思璉爲安徽巡
撫王師爲浙江布政使胡紹芬爲直隸按察使由河南撫○丙午
以攻克如郎功加慶復太子太保仍加三級紀山等各增秩有差
○戊申以直隸慶雲縣連年荒歉命每歲蠲免地丁十分之三著

爲例○是月兩廣總督策楞奏安南匪徒莫康武等爲番兵所敗
領男婦數千人在七源夷州居住日事搶掠見飭各邊悉心防範
報聞

六月丙寅慶復奏會同班第努三李質粹進攻了魯泥日寨施放
地雷班滾並泥日寨頭目姜錯太等燒斃碉內報聞○丁卯諭軍
機大臣等慶復奏四月二十日官兵到了魯圍攻泥日寨至二十
三日夜一更時分齊撲碉下直衝碉門劈開竅孔施放地雷連燒
碉樓賊番盡行燒斃班滾及伊家口並惡木勞丁姜錯太等一齊
燒斃等語看此奏瞻對一事業已成功矣雖未殲獲班滾明正典
刑若果係燒斃亦與正法無異但據報燒死情形尙有可疑之處
班滾係眾酋頭目危急之際未必卽坐以待斃其潛逃藏匿自必
有之事卽使燒斃想其情迹亦必與眾人不同斷無俱成灰燼不

可辨識之理又據俄木丁等同稟訪聞班滾於四月十四日逃赴沙加邦家住過三日姜錯太以沙加邦寨小難以久匿暗爲接赴伊寨藏匿大兵圍困四面攻打班滾實在燒死我等情願出結又稱沙加邦與丹批等向爲惡黨亦經檄飭速爲設法追捕務盡根株不使稍留餘孽等語奏內止稱設法追捕惡黨餘孽並未查及班滾實在曾到沙加邦寨與否又係何日逃至泥日寨此種亦未根究又據奏投誠各番咸供班滾逃住姜錯太家官兵圍攻並未逃出事屬可信惟是班滾家口不止數人豈能槩爲攜帶自必另有潛匿見飭各鎮嚴拏等語班滾家口旣可以潛逃而班滾狡猾異常反不爲逃生之計乎以上種種可疑情節慶復不應遽信爲確然見在瞻對業已勦撫官兵自應陸續減撤惟班滾渠魁斷不可容其漏網儻稍有疏虞遊魂未盡則此番用兵何能免收功不

慎之譏耶可密傳諭與慶復務必留心蹤迹毋留遺孽毋墮擒計
至於善後事宜最關緊要眾番總恃碉樓爲負隅之計此次我兵
攻打亦甚費力其未經勦焚之各寨自不便令其拆毀若旣毀之
碉樓任其復行建造則將來伊等故智復萌未必不又恃此爲三
窟也從前業已降旨令慶復親至彼地籌畫定議今可速行再寄
諭與慶復如何布置不使復建碉樓而番眾又得棲身安業詳看
彼地情形妥協辦理以期萬全尋奏臣初聞班滾燒斃並無確據
不敢遽信是以遲至半月尙未奏報迨各降番等細向各寨躡探
無蹤而漢土官兵暨遠近番眾萬口一辭歌呼稱慶臣見此光景
班滾燒斃似屬實情且山箐崎嶇捕空窮追勢有所難是時各路
輕齎口糧不及十餘日不得不乘勢捲撤以收大局留兵四千辦
理善後恐事後留兵全撤魍魎露形亦事理所或有故但聲言查

擊家口而密令汪結陰爲察訪汪結與贍對仇讎誓以必殺班滾爲事又令各土目分布贍地復使鄰近土司分其地勢即使班滾危急必無坐以待斃之理緣是時四路兵力齊集班滾猝不及逃以致圍困燒斃並據俄木丁等認出班滾隨帶鳥槍銅碗等物件但以數千人圍燒礮寨大火數日賊眾俱成灰燼實難辨識其礮樓一節臣已列入善後條內不敢草率了事得旨覽奏俱悉○以打箭爐口內外番眾從征效力再免貢賦二年○丙子建湖南社穀總倉○丁丑京師地震申命求言○庚辰吳拜丁憂以塞爾赫署倉場侍郎

由內閣學士署

○辛巳命江西巡撫修護宋臣謝枋得祠

○甲申給事中周祖榮奏進經史講義恭錄易經坤文言君子敬以直內義以方外二句引宋儒黃榦之言疏解進呈 上召入諭曰此內引黃榦所云乾言德業坤言敬義實相經緯欲進乾之德

必本之以坤之敬欲修乾之業必制之以坤之義數語及爾所釋俱未達韋經本義蓋德業無定體而敬義有恆功故德有君子之德有小人之德業有大人之業有小人之業文言所云進德修業蓋發明九三君子終日乾乾夕惕若之義是卽敬義也坤之直內方外蓋本諸此豈可謂乾之德業反本於坤之敬義乎乾包乎坤坤承乎乾猶之地承天臣奉君子遵父妻從夫不可倒置也修身齊家治國平天下一以貫之耳○辛卯諭據江蘇布政使安甯奏稱自免米豆稅銀以來弊竇叢生不可枚舉卽如豆餅應稅今則載豆過關作餅矣香油應稅今則載芝蔴過關矣此據大關而言至其餘口岸借稱免稅不服查驗往往恃眾搶關止得任其所往莫可如何且商賈惟利是圖受免稅之恩不肯減價以售之民胥役乘奸作弊以飽無厭之橐米數日多國課日少而米價之貴較

甚於前應請仍照舊徵收等語朕思加惠商民恩施格外於乾隆七年四月內特降諭旨將各關向來例應徵收之米豆稅課悉行蠲除原因小民朝餐夕飡維穀是賴免其輸稅則百穀流通糧價必減民食可得充裕商正所以惠民也乃自免稅以後各關所報過關之米果日見較多於前而價值並未平減且反加增朕細加諮訪皆因商人惟利是圖不知朕恩並不肯因免稅之故稍減價售賣與民且過關之時隱匿夾帶種種偷漏胥吏又乘勢爲奸刁蹬勒索以致米價轉昂百姓並未受益安甯所奏確係實情此亦臣民所共知卽朕亦不能謂彼言非是也是減稅之舉惠未及民徒使奸商胥吏飽其慾壑耳崇本抑末乃古帝王治天下之常經商賈貪利病民亦國法之所當懲者但朕念眾商乃無知愚人當先加以化導冀其醒悟不忍於未經曉諭之先降旨遽循舊例

著各該督撫仰體朕心剴切曉諭俾各商感發天良悉除私弊督撫等仍設法查察妥協辦理庶幾足食便民閭閻均受其福矣嗣後如果年歲歉收而米價昂貴尙屬情理中事若遇豐收之年米糧販運者多其價仍未平減則明係奸商教而不改怙過不悛此減賦之恩專爲商人之所壟斷不能使草野均沾是朕以國家之制賦爲無益之蠲除轉不如照例徵收使帑項有餘得以大沛恩膏民沾實惠爲挹彼注茲之用也但輕徭薄賦朕之本懷凡受賜者果能改其嗜利欺公之惡習勉爲善良自可永承惠澤朕實有厚望焉○甲午議政王大臣議覆前據雲南總督張允隨奏滇省永順東南徼外有蠻名卡瓦其地茂隆山廠因內地民人吳尙賢赴彼開採礦砂大旺該酋長願照內地廠例抽課作貢計每歲應解銀一萬一千餘兩爲數過多可否減半抽收等語臣等以卡瓦

遠居徼外吳尙賢越境開礦似屬違例並有無內地民人前往蠻地滋事之處行令該督查明具奏茲據覆稱滇省山多田少民鮮恆產惟地產五金不但滇民以爲生計卽江廣黔各省民人亦多來滇開採至外夷雖產礦硯不諳煎鍊多係漢人赴彼開採食力謀生安靜無事夷人亦樂享其利查定例止禁內地民人潛越開礦而各土司及徼外諸夷一切食用貨物或由內地販往或自外地販來不無彼此相需是以向來商賈貿易不在禁例惟查無違禁之物卽便放行貿易民人或遇貲耗欲歸無計不得不覓礦謀生今在彼打礮開礦及走廠貿易者不下二三萬人其平常出入莫不帶有貨物其廠民與商賈無異若槩行禁止此二三萬人生計攸關况內外各廠百餘年來從無不靖以夷境之有餘補內地之不足亦屬有益今生蠻卡瓦葫蘆酋長蚌筑雖化外未通職貢

其獻納實出誠悃請照孟連土司輸納募迺廠課減半實收之例
准其減半報納仍將所收以一半解納一半賞給該酋長應如該
督所請辦理至民人往來番地巡防宜密或有逃犯奸徒私入外
番廠地滋事仍令該督嚴飭官弁實力稽查從之○是月浙江巡
撫常安奏查江海水潮出入之所凡有三處近蕭山者爲南大壩
近海甯者爲北大壩蜀山之南有中小壩一道向來江海匯流由
此出入南北兩壩漲沙寬闊杭紹俱慶安瀾自中小壩湮塞南大
壩淤出之地已成平陸於是溜勢直趨北大壩而海甯始虞泛溢
議修議築歲費帑金無算乾隆九年訥親勘視海塘情形擬將中
小壩故道開濬深通分減北大壩溜勢令臣相機辦理臣查蜀山
迤北向有積沙寬至四五丈橫亘中間先就沙觥開溝四道均成
坎形以引潮水攻刷嗣後不時疏通節經大汛攻刷積沙上年冬

聞漸覺坍卸溜緩潮平開溝已有明驗臣思趁此水勢順利正宜及時疏濬深通卽不能全溜直達中壘而水勢南分北岸塘工不至受患節次專派員弁督率兵目挑挖本年春汛伏汛已過南沙坍卸殆盡蜀山已在水中儻秋汛不復湧沙則大溜盡行中小壘矣得旨此言安可輕出亦再看三五年後何如耳如果全行中小壘固可喜之事也